

Eprêw

Ijaew hwÿr kagà

Kagà ja na pre Ijaew ò amnhĩ kwÿjê mã hipêx nom mẽ pahte hipêx xwÿnh nhĩxi mar kêt. Na pre tanhmã hamaxpêr to nê amnhĩ nhĩxi hã kagà hkêt nê. Apu Pawre rÿ apu axtem mēhōja na pre hipêx. Ijaew kwÿjaja uràk nê Jejus kôt amnhĩ xunhwÿr xwÿnhjê mã na pre hipêx nê mẽ hwÿr kumê. Ijaewjaja mẽ hixi hō pê Eprêw. Jakamã nhũm kagà nhĩpêx xwÿnhja mẽ hwÿr hipêx nê kumê. Nê kamã mẽ kãm mẽmoj jarênh rax nê tanhmã Jejus jarênh to.

Nê mẽ hkwyjaja hkwyjê hkĩnhã kãm Jejus prãm kêt jakamã na prem hkaga nê mẽ kot amnhĩ nhĩpêx tũm o ujanãr prãm xàj tanhmã mẽ homnuj to ho pa. Jakamã nhũm kagà nhĩpêx xwÿnhja tanhmã ja hã mẽ kãm kapêr to.

Nê na pre tanhmã Tirtũm nhõrkwy kaakre hã kagà hto. Nê kaxkwa kamã õrkwy mexja nhũm tanhmã hã kagà hto nê mex o õrkwy kaakre jakrenh ã harê.

Nê mẽ kot Jejus ã amnhĩ xà htÿx kamã hamak o pa htã mẽ kot tee ri ja hã amnhĩ pumunh nê Jejus kaga nê mẽ hkurê kamã hihtÿx nê. ã mēhōja mẽ kãm kapêr anê nê hã kagà nê mẽ hwÿr kumê. Nê mẽ kãm kapêr o:

1 1Pa Kris kôt ixkwÿjaja? Xà mẽ amex? E ot pa mẽ amã kagà nhĩpêx nê mẽ awÿr kumê. Amnepê m Tirtũm na pre mẽ panhĩgêjtê hwÿr ÿ hã kapêr jarênh o ri mẽ pa xwÿnhjê rē nhũm mẽ xatã mẽ kãm kapêr jarênh o ri mẽ hkôt pa. Ahpÿnhã tanhmã mẽ kãm kapêr to ho amnhĩrit o mẽ hkôt pa. Nhũm Tirtũm xatã mẽ hkanrêhã mẽ hkra nê mẽ htãmnhwÿjê hwÿr mẽ hkwyjê rē nhũm mẽ kãm kapêr jarênh o ri mẽ hkôt pa. Nom mẽ kãm kapêr piitã harênh kurê kumrêx kêt nê. Na prem ãm hkwy pix jarê. Tã nhũm hpãnhã mẽ hkwyjaja wamtajê mÿr pê mẽ hwÿr mra nê axte mẽ kãm hkwy jarênh o ri pa. Jao ra mẽ kãm harênh jatur xãm mẽnh o mō. 2-3Tã nhũm Tirtũm Kraja mẽ pahwÿr wrÿ nê mẽ pamã kapêr jarênh jatur xãm kumê. Kêp Tirtũm Kra jakamã te kot amnhĩ nhĩpêx pyrã nê pa. Uràk nê mex o mex. Nê wa hihtÿx xàja tipxi. Nê wa àhpumunh tÿxja mãânên tipxi. Jakamã mẽ pahte pano ho Tirtũm pumunh kêt tã Jejus pumunh pê te mẽ pahte Tirtũm pumunh pyrãk. Uràk nê kot amnhĩ to rax o mẽ pahpiitã mẽ pajakrenh par. Amnepê m kormã mẽmoj kêt ri nhũm Jejus Tirtũm kukwak ri mẽmoj piitã ho kator

pa. Tã koja Tirtùm nhÿrmã kãm mêmoj piitã õr pa. Kaxkwa kamã mêmoj piitã nê jar pika piitã hkõt nhũm kãm piitã õr pa.

Nê Jejus xàhpumunh xà pix kukwak ri na mêmoja arĩ rãhãã. Na pre mêm pañê mêm pahte amnhĩ tomnuj piitã hpãnhã amnhĩrer par kaxyw mêm pañê ty. Hãmri akupÿm htĩr hãmri nê ma akupÿm kaxkwa hwÿr api. Tirtùm xihtÿx o hihtÿx xwÿnhja wÿr akupÿm api. Nê õ krĩ kamã upõk rũm pahi maati hkrĩ xà hã kuri hkrĩ ho hkrĩ. Nê ãhkõ hã mêm pahto amnhĩptàr rãhã ho hkrĩ.

Jejus mêm Tirtùm kapër o mêm wrÿk xwÿnhjê jarênh

4-5Nê Jejus kot amnhĩ to rax o Tirtùm kapër o mêm wrÿk xwÿnhjê jakrenh jakamã na pre ã Tirtùm kãm kapër anê nê kãm:

Na ka amnhĩ to rax o mêm kot ixkapër o mêm wrÿk xwÿnhjê jakre.

Mêm kot inhmã tanhmã amnhĩ nhĩpêx to ho mêm pa xwÿnh na mêm.

No mêm kurom apê Ixkra kumrêx jakamã amex o ate mêmoj piitã hakrenh par.

Nê apê pika nhõ xwÿnhjê hwÿr ixte amênh mã xwÿnh na ka. Na apê Ixkra kumrêx.

Kot paj jarãhã ixpê anhĩpêxã hã mêm piitã mêm kãm amnhĩ to amnhĩrit. Pa na ixpê anhĩpêxã.

Anhÿr o Kra Jejus mã kapër. Na pre kapër o mêm wrÿk xwÿnhjê mã ã kapër anhÿr kêt nê. Jejus mã pix mã ã kapër anê.

6Nê koja nhÿrmã akupÿn mêm pahwÿr Kra mênh kaxyw hãmri nê kapër o mêm wrÿk xwÿnhjê mã kãm:

E ota Ixkrata. Ixkra kumrêx na. Kot amnhĩ to rax o mêm piitã mêm hakrenh par.

Jakamã kêr ka mêm apiitã kutã arõrõk nê kãm mex o mex ã harê.

Anhÿr o mêm kãm kapër. 7Nê kapër o mêm wrÿk xwÿnhjê na pre axtem tanhmã mêm harênh to nê mêm harênh o:

Ixkapër o mêm wrÿk xwÿnhjaja na pa hte nhÿhÿm mêm kurê nhũm htem inhmãr xà hkõt ma nhÿhÿm mra nê inhmã tanhmã amnhĩ nhĩpêx to.

Te ixte ma nhÿhÿm kõk nê kuwyja mênh nhũm ixkapër kõt nhÿhÿm mõrja pyrãk.

Anhÿr o mêm harê. 8No ã Krata jarênh anhÿr kêt nê. Na pre tanhmã kãm kapër to nê amnhĩ pyrã nê kêp Tirtùm ã harê nê kãm:

Pa Tirtùm? E ka kot kaj mêm ho amnhĩptàr rãhã ho akrĩ. Nê akatàt kõt mêm ho amnhĩptã.

9 Koja mêm tãm amnhĩ nhĩpêx ka ja hã mêm omu nhũm ja amã mex nê.

No koja mêm tanhmã amnhĩ tomnuj to ka ja hã mêm omu nhũm ja apê omnuj nê. Mêm kot tanhmã amnhĩ tomnuj to ho paja na omnuj tÿx.

Tã ate inhmã hprãm xà hkôt amnhĩ nhĩpêx jakamã na pa mẽ
kaxyw axãm ka akĩnh kãm mẽ ho amnhĩptà.

Ixpê anhõ Tĩrtũm na pa ã amã ixkapêr anê. Anê.

10Hãmri nê kãm:

Pa Pahihti. Nà amnepêm kormã mẽmoj kêt ri na ka pre
ixkukwak ri pika nê kaxkwa ho akato. ãm hãmri na ka pre
ã amnhĩ nhĩpêx anê.

11 Tã nom koja nhỹrmã hamê wa hapêx pa. ãm kaxipix kot kaj
kurom arĩ arãhãã nê aa ajapêx kêt nê.

Kaxkwa nê pika koja wa nhỹrmã te ixkre hã pô htũm kot amnhĩ
nhĩpêx pyrãk.

12 Kot kaj wa hipêx o te mẽ kot ixkre nê pô htũm mã hikranh par
nê hpãnhã hã nyw janhôr pyrãk.

Jao pika nê kaxkwa htũm o ajapêx pa nê hpãnhã nyw nhĩpêx.
Kaxkwa nyw nhĩpêx nê pika nyw nhĩpêx.

Nom kot kaj pika nê kaxkwa tũmta pyrã nê aa awej nê axirerek
kêt nê.

Kot kaj arĩ anyw nê axihtỳx rãhã apa ho apa nê aa ajapêx kêt nê.
Arãhã atĩr tũm nê apa ho apa xwỳnh na ka.

13 E jar inhĩhkô hã nhỹ nê inhmã mẽ ho amnhĩptàr o akrĩ.

Kot paj mẽ kãm akurê xwỳnhjê pynênh pa nê man awỳr mẽ o
mra nê anhĩhkram mẽ haxàr pa. Anê.

ã na pre Tĩrtũmja Kra Jejus mã kapêr anê. No kapêr o mẽ wrỳk xwỳnhjê
mã ã kapêr anhỹr kêt nê.

14E kot paj hpãnhã ixprĩ hã mẽ amã Tĩrtũm kapêr o mẽ wrỳk
xwỳnhjê jarê ka mẽ inhma. Tĩrtũm mã na htem tanhmã amnhĩ nhĩpêx
to ho pa. Na hte nhỹrmã kuri mẽ htĩr tũm nê mẽ pa mã xwỳnhjê hwỳr
mê kurê nhũm mẽ ma mẽ hwỳr wrỳ nê tanhmã mẽ ho ajuta hto ho pa.
Na htem ã amnhĩ nhĩpêx anhỹr o pa.

Mẽ pahte Jejus kaga hkêt ã mẽ pamã karõ

2 1Tã ã Tĩrtũmja Kra kot amnhĩ to rax o kapêr o mẽ wrỳk xwỳnhjê
jakrenh ã harênh kot anhỹr jakamã kwa kêr pu mẽ kapêr mar tỳx
rãhã nê hkôt pix mã amnhĩ nhĩpêx o papa. Kot pu mẽ ho anhỹr kêt hãmri
nê gaa nê hkaga. 2Na pre Tĩrtũm kapêr o mẽ wrỳk xwỳnhjaja amnepê
mã mẽ panhĩgêtjê hwỳr wrỳ nê Tĩrtũm nhỹ hã mẽ kot tanhmã amnhĩ
nhĩpêx to ho pa hã mẽ kãm karõ nê ma akupỳm api. Nê katàt kôt ri mẽ
kãm Tĩrtũm kapêr jarênh o pa. Hãmri nhũm mẽ kot hkôt amnhĩ nhĩpêx
nê mar mex xwỳnhjaja nhũm mẽmoj mẽ kãm mex nê. No nhũm mẽ kot
mar nê ãm mar xwỳnhjaja koja mẽmoj mẽ kêp omnuj nê. 3Koja nhỹrmã
mẽmoj mẽ kêp omnuj tỳx kumrêx nhũm mẽ tee ri amnhĩ tã omu nê tee
ri kêp amnhĩptàr prãm kaprỳ nê mex kêt nê pa. Nom mẽ kot Tĩrtũm

kapêr mar tÿx xwÿnhjaja koja mêmôj mē kām mex o mex. Koja Tirtūm amnhī katut kôt mē kot amnhī tomnuj rēnh pa nē axte kām hamaxpêr kêt nhūm mē kuri htír tūm nē mex rāhā nē pa ho pa. Na pre Pahihti Jejus mē kot kapêr mar o kuhê xwÿnhjê kumrêx mā ã ja jarēnh anē nē mē kām:

— Nà kot kaj mē amnhī kaxyw inhmā ajamaxpêr nhūm Tirtūm ixtā mē apumu nē mē anē mē ate amnhī tomnuj piitā ho hapêx pa nē axte kām hamaxpêr kêt nē. Anē.

Hāmri nhūm mē kot kapêr mar nē hkôt mē pa ho mē pa nē xwÿnhjaja mar tÿx nē amnhī xô ri mē pamā harēnh o ri pa. Nē mē pamā:

— Nà ãm hāmri. Nà ã ja jarēnh kot anhÿr. Anē.

4Hāmri nē mē pamā aa mē pahte mēmoj pumunh kêt kwÿ ho anhÿr o ri mē pahkôt pa. Tirtūm Karō kot ja kaxyw mē ho mē àhpumunh tÿx jakamā nhūm mē ŷ hā ahpÿnhā tanhmā mē pamā amnhī nhīpêx to ho pa. Mē pahte ja hā mē omunh nē kamā pano pyma kaxyw. Nē ã mē pajamaxpêr anē nē pajamaxpêr o:

— Nà ãm hāmri na mē pamā ã Jejus jarēnh anē nē ŷ hā ã amnhī nhīpêx anhÿr o pa.

Anhÿr o pajamaxpêr kaxyw na prem ã mē pahkôt amnhī nhīpêx anhÿr o pa.

Mē pahpê Jejus tō nē htōx ã mē pajarēnh

Juāw 1.14; Rōmān 8.3-4; Piriapos 2.5-11; Korosê 2.9; Wam Juāw 4.2

5Nē na pre Tirtūm amnhī kukamā tanhmā amnhī jarēnh to nē nhÿrmā kot akupÿm mēmoj piitā ho nyw nē tām mēmoj piitā ho amnhīptār o pa hā amnhī jarē. No na pre kapêr o mē wrÿk xwÿnhjê mā ã mē kot amnhī nhīpêx anhÿr ã mē kām karō hkêt nē. Koja jajaja mē pahto amnhīptār o pa hkêt nē. 6Tirtūm kapêr ã kagà htūm kot ja jarēnh kot:

Kwa Tirtūm. Nà ãm hāmri na ka hte pika ja kamā ri mē ixpa xwÿnhjê jamār mex rāhā ho apa.

Akīnhā amarī ri mē ixpa xwÿnh tā amā mē ijapêê.

Nē mē ixkutā anojarêt rāhā ho apa.

7 Na ka hte tanhmā mē inhīpêx to pa mē te mē ixpê akapêr o mē wrÿk xwÿnhjê pyrāk.

Jao mē urāk nē akukwak ri mē inhmex nē ixpa ho ixpa.

Mē uràn mē ixàhpumunh nē ixihÿtÿx kêt tā mē inhmex nē ixpa.

8 Na ka pre ra ate mēmoj to akator xwÿnh piitā mē inhīhkram haxà.

Nà ãm hāmri na ka pre ã mē inhīpêx anē Tirtūm. Amex o amex.

Anē.

Na pre ra mēmoj piitāã mē panhīhkram haxà. Pika nē kaxkwa nē kapêr o mē wrÿk xwÿnhjaja nē mēkarōmnuti nē kot mēmoj piitāã hipêxja

nhũm mẽ panhĩhkram haxàr pa. Mẽ pahte ìhkô hã ho amnhĩptàr o papa kaxyw. No na pu mẽ kormã piitã ho amnhĩptàr kêt nẽ. 9No kêt Jejusja na Tirtũm mẽ pakurom ìhkram mẽmoj piitã haxàr par kumrêx. Kormã pika ja kamã ri pare ri na pre tanhmã amnhĩ nhĩpêx to nẽ Tirtũm kapêr o mẽ wrỳk xwỳnhjê hkĩnhã te amnhĩ to grire pyrã nẽ amnhĩ xà htỳx kamã hamak kãm ty. Tirtũm kãm mẽ pahto mex prãm xà ã mẽ pahpiitã mẽ panê htyk anẽ. Tã nhũm Tirtũm akupỹm ho htĩr nẽ akupỹm amnhĩ wỳr ho api nẽ kêp Pahi Maati mex o mex ã harê. Na pre ã Jejusja mẽ panê amnhĩ nhĩpêx anẽ nhũm Tirtũm ja hã omu nẽ kukwak ri mẽ pahto mex nẽ.

10Nẽ Tirtũm kot mẽmoj piitã ho kator jakamã mẽmoj piitã õ na. Na pre mẽ pakukamã hamaxpêr o:

—Inhmã ixkra xohtô hprãm. Kot paj nhỹrmã man amnhĩ wỳr mẽ ho api kê mẽ ixri mex rãhã nẽ pa ho pa. Nà kot paj ã mẽ hipêx anẽ. Nẽ Ixkra Jejus koja kêp mẽ õ Pahihti. Koja mẽ uràk nẽ mẽmoj punuj pumunh o pa hãmri nẽ à htỳx kamã hamak o kêp mẽ õ Pahihti mã tãm. Anẽ.

11Na hte Jejus mẽ panê mẽ pahte amnhĩ tomnuj rê nẽ hpãnhã mẽ pamã mẽ pahte amnhĩ nhĩpêx nyw jagiê nhũm Tirtũm ja hã mẽ pahpumunh kôt mẽ pahto hkra. Kêp Jejus Nhĩpêêxã nẽ kêp Mẽpanhĩpêêxã maati jakamã nhũm Jejusja mẽ pahpê htô nẽ mẽ pahpê htôx ã mẽ pajarẽ nẽ mẽ panhỹ hã hkĩnh nẽ.

12Tirtũm kapêr ã kagã htũm ã mẽ pajarênh kot anhỹr. Kamã Jejusja Mẽpanhĩpêêxã maati mã mẽ pajarênh kot:

Koja ixtô nẽ ixtôxjaja akapêr mar kaxyw axpên wỳr akuprô pa
ma mẽ hkôt mra nẽ mẽ kãm akapêr jarê nẽ mẽ ìhkô hã
amex ã gre. Anẽ.

13Hãmri nẽ kãm:

Kot paj amnhĩ kaxyw akôt pix mã ijamaxpêr mex o ri ixpa. Anẽ.

Hãmri nẽ hpãnhã kãm:

Ot pa akrajê hkôt ri ixpa ho
ixpa.

Ka na ka pre mẽ kêp ixtô nẽ
ixtôx kaxyw inhmã mẽ
agõ.

Koja mẽ ixpyrà nẽ amnhĩ kaxyw
amã hamaxpêr rãhã ho pa
Tirtũm. Anẽ.

14Nẽ mẽ pahpê pika nhõ xwỳnhjaja na pu htem ãm ri panhĩ pix ã papa. Nẽ panhĩ kamã pahkamrô hã ri papa. Jakamã na pre Jejus kot mẽ panê htyk kaxyw mẽ pahwỳr wrỳ nẽ mẽ pahpyrà



Eprêw 2.12-13

nê ĩ ho mẽ pakamã kato. Tã mẽmo kaxyw na pre ĩ ho ĩ nê mẽ pahkôt pa? Nã ĩ ho htyk o Satanasti pẽ hihtÿx xã ho hapêx par kaxyw na pre ã amnhĩ nhĩpêx anê. Satanasti kêp mẽ kot amnhĩ tomnuj xwÿnhjê hpãm nê kêp mẽ htyk xwÿnhjê hpãm. 15Jakamã na hte kot mẽ pahtã ĩhkra pikamÿr pyrãk o mẽ panhĩpêx pu mẽ ÿ hã pamã pahtyk pyma nê ri papa. Tã ra Jejus kot mẽ pahwÿr wrÿk nê te kêp mẽ papytãr pyrãk o mẽ panhĩpêx jakamã pu mẽ tee ri pahtyk kukamã pajamãxpêr o ri pamã ma ho papa hkêt nê.

16Nê Tĩrtũm kapêr o mẽ wrÿk xwÿnhjê ho mex kaxyw na pre Jejus pika hwÿr wrÿk kêt nê. Mẽ panhĩgêť finat Apraãw pyrã nê mẽ panhĩ ho panhĩ xwÿnhjê ho mex kaxyw na pre wrÿ. 17Ijaew nhõ patrejaja na pre htem mẽ kot amnhĩ tomnuj mÿrapê mẽ hpãnhã Tĩrtũm mã mry hkwy pa nê hkamrõ kapĩ nê mẽ ho Tĩrtũm wÿ. Kot hã mẽ omunh nê mẽ mex ã mẽ harênh kaxyw. Tã nhũm Jejus wrÿ nê mẽmo mryta pyrã nê ã mẽ panê hkamrõ pikapĩr anê. Kaxyw na pre mẽ pahtõ maatija mẽ pahwÿr ĩ ho ĩ nê wrÿ nê mẽ pahpyrã nê ni nhõhy rũm kato. Jao kêp mẽ pahto Tĩrtũm wÿr xwÿnh maati. Na pre Tĩrtũm kãm hprãm xã hkôt mẽ panê mẽ pahte amnhĩ tomnuj pãnhã amnhĩrer pa. Tã kot mẽ pahpyrã nê mẽmoj punuj pumunh nê amnhĩ xã htÿx kamã hamak o pa jakamã kêp mẽ pakamã ukapĩr xwÿnh ã pixi mex na. 18Kormã htyk kêt ri na pre mẽ pahpyrã nê omnuj nê ri pa. Nhũm mẽkarõmnuti nhõ pahi kot tanhmã amnhĩ tomnuj to hprãm xãj tee ri hkôt kãm ahkrox o pa hkapyrÿ nhũm hkôt amnhĩ nhĩpêx kêt nê amnhĩ nê ho axtem nê. Jakamã koja Satanastija urãk nê tanhmã mẽ panhĩpêx to nhũm Jejus mẽ pahtã omu nê amnhĩ pyrã nê tanhmã kêp mẽ panhĩpêx to pu mẽ ÿ hã kutã amnhĩ to htÿx nê papa.

Jejus kot amnhĩ to rax o Mojes jakrenh ã harênh

Juãw 1.17-18

3 1E ixkrãmnhwÿjaja. Ra Tĩrtũm kot mẽ pahte kapêr mar nê tãm amnhĩ nhĩpêx o ri papa kaxyw mẽ pahto hkra jakamã kwa kêr ka mẽ Jejus kot tanhmã mẽ pamã amnhĩ nhĩpêx toja mã ajamãxpêr rãhã ho ri apa. Na pre Tĩrtũm mẽ pahwÿr kumê nhũm mẽ pahwÿr wrÿ nê Tĩrtũm kapêr o mẽ pajahkre ho ri mẽ pahkôt pa. Nê te kêp mẽ panhõ patre pyrã nê mẽ pahto Tĩrtũm wÿr o pa. 2Na pre Tĩrtũm finat Mojes kwÿ kaxyw Mojesja xãm nhũm kãm hprãm xã hkôt tanhmã mẽ hipêx to ho pa. Tã nhũm hpãnhã mẽ pakaxyw Kra Jejusja xãm nhũm Mojes pyrã nê Tĩrtũm kãm hprãm xã hkôt pix mã tanhmã mẽ panhĩpêx to ho pa. Hamẽ na pre wa Tĩrtũm jamãxpêr xã hkôt tanhmã kãm mẽ panhĩpêx to ho pa.

3Koja mẽhõ amnhĩm ixkre mex nhĩpêx nê hipêx pa nhũm hkwyjaja hwÿr mra nê omu nê mex kumrêx ã harê. Nom kot hipêx xwÿnhãtã ãhpumunh xã hkôt hipêx jakamã tãm na mex o kot ixkreta jakrenh. Ja

pyrà nê finat Mojes kot amnhĩ to rax tã nhũm Jejus kot amnhĩ to rax o kot hakrenh. Mojes te kêp ixkre nhĩpêxta pyrãk no Jejus te kêp ixkre nhĩpêx xwỳnhnta pyrãk jakamã kot amnhĩ to rax o kot Mojes jakrenh.

4Nê mẽ kot ahpỳnhã amnhĩ krã hkôt tanhmã ixkre nhĩpêx to jakamã kot hipêx xwỳnhnta na mex o ixkreja jakrenh. Tã ja pyrà nê Tĩrtũm kot mẽmoj piitã ho kator jakamã kot amnhĩ to rax o kot mẽmoj piitã ho kator xwỳnh jakrenh par.

5Nê finat Mojes na pre hte Tĩrtũm kãm hprãm xà hkôt tanhmã amnhĩ nhĩpêx to ho pa. Nê ma kãm hkwỳjê piitã hkôt mẽ kãm kapêr jarênh o ri pa. Tĩrtũm tanhmã kot mẽ kãm kapêr tota kukamã nhũm mẽ kãm harênh o mẽ hkôt pa. No ãm Tĩrtũm mã tanhmã amnhĩ nhĩpêx to ho hpa xwỳnh pix na pre.

6Nê Kris haxwỳja na pre hte Tĩrtũm kãm hprãm xà hkôt tanhmã amnhĩ nhĩpêx to ho pa. Nom Mojes rom kêp Tĩrtũm Kra kumrêx jakamã kurom kêp mẽ panhõ Pahihti kumrêx. Tã kwa kêr pu mẽ kãm hprãm xà hkôt pix mã tanhmã kãm amnhĩ nhĩpêx to ho ri papa. Mẽ kot hã tanhmã mẽ panhĩpêx to htã pu mẽ ỹ hã mẽ kutã amnhĩ to htỳx nê papa nê pajamxpêr o:

—Nà ixpunuj nê ixpa htã kot paj ixpunuj rãhã ixpa ho ixpa hkêt nê. Koja nhỹrmã Tĩrtũm ixto mex kumrêx pa axte tanhmã ixpunuj to nê ixpa hkêt nê. Hêxta waa nê. Nà ja inhmã hprãm tỳx kumrêx.

Anhỹr o amnhĩ kukamã pajamxpêr o papa.

Mẽ pahte Tĩrtũm kaga hkêt ã mẽ pamã karõ

Wam Korõt 10.1-11; Jutre 5

7-8Amnepêm na pre mẽhõja tanhmã Tĩrtũm Karõ nhỹ hã kapêr to nê kapêr o:

E kêr ka mẽ Tĩrtũm kapêr mar tỳx o apa.

No ama nê ãm ama nê ri hã apa hkêt nê. Rỳ kapêr pê akrã hihtỳx o apa hkêt nê.

Mẽ akukamã mẽ anhĩgêjtaja na prem ã amnhĩ nhĩpêx anê nê Tĩrtũm kapêr pê hkrã hihtỳx o pa. Kapôt ã Mojes kôt mẽ pata ã na prem kãm Tĩrtũm kapêr mar prãm kêt nê. Nê tee ri amnhĩ kukamã hamaxpêr nê akupỹm Ejit wỳr hkrã nê axpên mã: “Kwa na pu mẽ ra pahpunuj tỳx nê papa nhũm Tĩrtũm ãm ja hã mẽ pahpumu nê tanhmã mẽ pahto mex to hkêt nê. Mãn ra mẽ pahkaga nà? E kwa pu mẽ awjanã nê ma akupỹm Ejit wỳr mãn papa.” Anê.

9-10 Na prem ã axpên mã kapêr anhỹr o ri pa hã amgrà pê 40.

Tĩrtũm xatã kot tanhmã mẽ ho mex to nhũm mẽ kot amnhĩ tã omunh tã ãm omu nê htỳx ri amnhĩ hkrã hkôt pa.

Nhũm tee ri amnhĩ tã mẽ omu nê mẽ kamã gryk nê.

Hāmri nê hamaxpêr o: “Nà pêr mē hamaxpêr kot mē hã hkwý jêt kêt kumrêx. Te mē hamak kre hkêt pyrã nê ixkapêr mar kêt nê.” Anhÿr o hamaxpêr.

- 11 Hāmri nê mē kãm: “E mē inhma. ã mē ate amnhĩ nhĩpêx anhÿrja mÿrapê kot kaj mē ma ixte mē amã pika mex nhõr mã xwÿnhhta wÿr apa hkêt nê.” Anhÿr o mē kãm kapêr. Anê.

Ã mēhõja Tirtũm Karõ nhÿ hã te Tirtũm tãm kot mē kãm kapêr pyrãk o mē harênh anê. 12Jakamã kwa mē okora ixkrãmnhwÿjaja. Kêr ka mē amnhĩ to mex o apa. Tirtũm kêp Mēpahpãm ã pixi mex tã kot kaj mē tanhmã ajamaxpêr punuj to rÿ amnhĩ kaxyw hkôt ajamaxpêr kêt hãmri nê te ate amnhĩ katut kôt ãm pyrãk o hipêx nê hkaga. Kwa mē ã amnhĩ nhĩpêx anhÿr kêt nê. 13Kêt mē Kris kôt axpên to axihtÿx o ri apa. Nê apkati mē ã axpên nhĩpêx anhÿr rãhã nê. Kot kaj mē anhÿr kêt hãmri nê mē amã Tirtũm kapêr mar prãm kêt ã amnhĩ to amnhĩrît. Jao tanhmã amnhĩ tomnuj to ho ri apa nê atÿx ajamaxpêr o: —Nà ixte ã amnhĩ tomnuj anhÿr tã nhũm Tirtũm ja hã ixpumu nê ãm hã ixpumu.

Anhÿr o ajamaxpêr japêr. Rÿ mē ajamaxpêr o:

—Nà na pa hte ã amnhĩ tomnuj anê nhũm Tirtũm ja hã ixpumu nhũm ja kãm mex nê.

Anhÿr o ajamaxpêr japêr. 14Kwa mē ri ã ajamaxpêr anhÿr kêt nê. Amnepê mã mē pahte Kris kôt amnhĩ xunhwÿr nhũm kot mē pahto hkrata ã na pu prem amnhĩ kaxyw hkôt pajamaxpêr o papa. Tã kêr pu mē arĩ ã amnhĩ nhĩpêx anhÿr tÿx o papa rãhã ty. 15Tirtũm kapêr ã kagã htũm kot ja jarênh kot:

E kêr ka mē Tirtũm kapêr ma nê mar tÿx nê.

No ama nê ãm mar nê ri hã apa hkêt nê.

Rÿ mē kot hkaga xwÿnhjê pyrã nê kêp akrã hihtÿx kêt nê. Anê.

16Mē panhĩgêjtaja na prem Mojes kôt pika pê Ejit rũm kato nê hkĩnh nê ma kapôt ã kormã pika mex wÿr pa. Nom Tirtũm kapêr mar nê hkôt amnhĩ nhĩpêx rãhã hkêt nê. Na prem kuma nê hkôt amnhĩ nhĩpêx o hã apkati grêre htã ra mēmoj nhÿ hã omnuj nê pa hã amnhĩ pumu nê tee ri amnhĩ kukamã hamaxpêr. 17Jao xatã kapêr nhĩrõp kuhê nê amnhĩ hkrã hkôt pix mã amnhĩ nhĩpêx o pa ho ra hã amgrã pê 40. Hãmri nhũm tee ri amnhĩ tã mē omu nhũm ja kêp omnuj nê. Jakamã nhũm mē piitã kapôt ã ri pa nê gaa nê pikaprãr pa. 18Mē kot kapêr mar kêt jakamã nhũm mē kãm:

—Nà ã mē ate amnhĩ nhĩpêx anhÿr o ri apaja mÿrapê kot kaj mē ixte mē amã mē amex nhõr mã xwÿnhhta wÿr apa hkêt nê. Anê.

19Tã mē kot amnhĩ kaxyw Tirtũm kôt hamaxpêr o pa hkêt jakamã na prem pika mexta wÿr hpõx kêt rãhã pikaprãr pa. Nhũm mē hkra nê mē htãmnhwÿjê pixjaja na prem mē mÿr pê hwÿr põj nê kamã pa.

Mê pahte Tirtûm kukwak ri pajamakêtkati nê ri papa hã mê pajarênh

4 ¹Mê pahte Tirtûm kukwak ri pajamakêtkati nê ri papa ho papaja Tirtûm kãm hprãm jakamã kwa kêr pu mê amnhĩ pumunh mex o papa. Nê wam mê panhîgêt rom Tirtûm kapêr mar tỳx nê hkôt mãn kêr ri amnhĩ nhîpêx mex rãhã nê. Kêr pu mê kurom mê pajamak kãm amnhĩ krit xã hã pika mexta wỳr pøj. ²Mê kot mê pahpyrà nê Tirtûm kapêr mar mex tã na htem amnhĩ kaxyw hkôt hamaxpêr kêr nê. Te mê kot mar kêr pyræk. ³Ãm mê kot amnhĩ kaxyw Kris mã hamaxpêr xwỳnh pixjaja na htem kukwak ri hamakêtkati nê ri pa ho pa. Amnepê mã mẽmoj piitã hkêt ri na pre Tirtûm mẽmoj piitã ho kator pa hãmri nhũm apkati nhũm axte mẽmoj tã àpênh kêr nê. Ãm õ krĩ kamã arĩ hamakêtkati nê hkòkòt o hkrĩ. Tã mê pahte uræk nê pajamakêtkati nê papa ho papaja na kãm hprãm. No wam ri mê pa xwỳnhjaja mê kot amnhĩ tomnuj mỳrapê na pre Tirtûm mê kot urà nê hamakêtkati nê paja nê mê hkurê. Kapêr ã kagà htũm kot harênh kot:

Na pre Tirtûm tee ri amnhĩ tã mê kot hipêx ã mê omu nhũm ja kêp omnuj nê. Hãmri nhũm mê kãm: “Nà kot kaj mê ixkukwak ri axàmnhĩx ajamakêtkati nê apa hkêt nê.” Anê.

4Nê kot harênh kot:

Na pre Tirtûm àpênh ã arĩgro kêp 6 hãmri nhũm arĩgro pê 7ta ã nhũm axte mẽmoj tã àpênh kêr nê. Na pre arĩ hkòkòt o nhỹ. Arĩgro pê 7 ã arĩ hamakêtkati nê hkòkòt o nhỹ. Anê.

5Nê mê kot kapêr mar nê ãm mar xwỳnhjê jarênh kot:

Kot kaj mê aa ixkukwak ri axàmnhĩx nê ajamakêtkati nê apa hkêt nê. Anê.

6Mê panhîgêjtaja kot amnhĩ kaxyw Tirtûm kòt hamaxpêr kêr jakamã na prem hamakêtkati nê ri pa hkêt nê. Tã mê papajaja na Tirtûm arĩ kãm mê paxàmnhĩx nê pajamakêtkati nê papa hprãm. ⁷Amnepêm Ijaew Tirtûm kòt hamaxpêr kêr jakamã na prem kapòt ã pikaprãr pa. Hãmri nhũm amgrà xohtô nê hapêx nhũm Tirtûm mê hkanrêhã mê htàmnhwỳjê hõ pê finat Tawija mã kapêr nhũm kuma nê mê pamã tanhmã kapêr tota ã kagà nê hã kagà kot:

Kwa kêr ka ixkapêr ma nê mar tỳx nê.

No mê anhîgêjtê pyrà nê akrã hiltỳx ho inhma nê ãm inhmar kêr nê. Anê.

Na pa pre ra mê amã ã ja jarênh anê. **8**Na pre finat Jojueja finat Mojes mỳr pê ma pika pê Kanaã hwỳr mê hkanrêhã mê hkrajê o pa nê hwỳr mê o pøj. Tã nhũm prem Jojue kukwak ri hamakêtkati nê pa ho pa hkêt nê. Kêp ãm kukwak ri ã amnhĩ nhîpêx anhỹ ronhỹx Tirtûm axte mê kãm mê hamakêtkati nê mê hamak kãm amnhĩ krit nê mê pata hkukamã harênh kêr nê. **9**Nom mê pahte kukwak ri pajamakêtkati nê pajamak

kãm amnhĩ krit nê ri papa ho papaja na Tirtũm arĩ kãm hprãm. 10 Na pre arĩgro pê 6ja ã mêmoj piitã ho kator pa nhũm apkati nhũm hamakêtkati nê hkôkôt o nhỹ. Tã kot puj mē pahpê hkrajaja amnhĩ to kuwỳ nhũm tanhmã mē pahkrã hto pu mē kukwak ri uràk nê paxàmnhĩx nê pajamakêtkati nê papa ho papa. Te Tirtũm àpênh pa nhũm apkati nhũm hamakêtkati nê hkôkôt o yrta pyràk. 11 Jakamã kwa kêr pu mē amnhĩ to kuwỳ kê ã mē panhĩpêx anê pu mē uràk nê ã amnhĩ nhĩpêx anhỹr rãhã ho papa. Nom kot pu mē pahkwỳ Ijaewjê pyrã nê kapêr kwỳm amnhĩ nhĩpêx o papa hãmri nê mē urã nê paxàmnhĩx pajamakêtkati nê papa hkêt nê.

Tirtũm kapêr te kot wapo xwa gix pyrãk ã harênh

12 Nê Tirtũm kapêrja te ĩ ho tanhmã kot mêmoj to kaxyw hihtỳx pyrãk. Nê te wapo xwa gix pyrãk. Koja mēhõ õ wapo xwa mex nê ho mêmoj jakàr mex nê. Ho mry hi jakàr mex pê kaxwỳnh kãm hi kanhĩn o amnhĩrĩt. Ja pyrã nê na hte Tirtũm kapêr mē pajamaxpêr o amnhĩrĩt nê mex ã harê rỳ omnuj ã harê.

13 Nê na htem Tirtũm pê mêmoj to pimxur kêt nê. Na hte hprĩ hã mêmoj piitã omunh pa. Nê mē pajamaxpêr kôt mē pahpumunh pa. Na pu htem ã kot mêmoj piitã omunh par anhỹr xwỳnhja noo mã tanhmã amnhĩ nhĩpêx to rãhã ho papa.

Jejus kêp mē panhõ patre maati hã harênh

Eprêw 10.19-25; Wam Juãw 2.1-2

14 Nê Ijaew nhõ patrejaja na pre htem Tirtũm mã amnhĩ jarênh xã hã ixkre hwỳr agjê nê kamã mē ho Tirtũm wỳr o pa. Ja pyrã nê na pre ra Jejus Tirtũm nhõ krĩ hwỳr api nê kamã mē pahto hwỳr o hkrĩ. Kêp Kra kumrêx jakamã kêp mē pahto Tirtũm wỳr xwỳnh maati. Jakamã kwa kêr pu mē amnhĩ kaxyw hkôt pajamaxpêr tỳx rãhã ho papa. 15 Satanasti na pre te kot mē panhĩpêx pyrãk o Jejus nhĩpêx. Nê tee ri kot tanhmã kãm kapêr to nhũm kot mar nê tanhmã amnhĩ tomnuj to hprãm xaj ãm ri kãm ahkrox kaprỳ nhũm kutã amnhĩ to htỳx nê hkôt amnhĩ nhĩpêx kêt nê. Tã kot Satanasti kot amnhĩ nhĩpêx ã omunh mex jakamã na hte kêp mē pahtãnopxar mex o pa. Kot mē paxirerek kôt mē pahpumunh mex. 16 Jakamã kwa kêr pu mē amnhĩ tã kamã pahpijaãm kêt kãm paxàmnhĩx ri amnhĩ to hwỳr o papa. Kêp mē pakutã nojarêt xwỳnh nê kêp mē pakamã ukaprĩ xwỳnh jakamã kêr pu mē tee ri mêmoj tã amnhĩ pumu nê amnhĩ to hwỳr kurê kumrêx. Hãmri nê ÿ hã paxàmnhĩx nê pajamakêtkati nê ri papa.

5 1 Nê mē panhõ patre maati Jejusja Tirtũm na pre mē pakaxyw ãm. Kêp mē pahkwỳ hã mē pakaxyw ãm nhũm hte mē pahto Tirtũm wỳr o pa. Nê kãm mē pahkĩnh xã nhõr o pa. Kot ja hã mē pahpumunh

ně mẽ pahte kapër kwỳm tanhmã amnhĩ nhĩpêx to ho papa hã mẽ pakamã gryk o hapêx tokyx anhỹr kaxyw.

2Mẽ panhĩgêjtjaja na pre htem mẽ õ patre maati hwỳr mra mẽ kãm tanhmã amnhĩ tomnuj to hã amnhĩ jarẽ nhũm mẽ kuma mẽ mẽ kamã ukapřĩ mẽ. Mẽ urã mẽ kormã kot Tĩrtũm kõt amnhĩ nhĩpêx totuj anhỹr jakamã na pre mẽ kot tanhmã amnhĩ jarẽnh toja ma mẽ mẽ kamã ukapřĩ mẽ. 3Hãmri mẽ mẽ hpãnhã Tĩrtũm mã mẽmoj gõ mẽ mããnẽn amnhĩ pãnhã kãm mẽmoj gõ. Mẽ urãk mẽ kot amnhĩ tomnuj o paja mỳrapê amnhĩ pãnhã kãm mẽmoj gõ. 4No na pre hte patrejaja amnhĩ krã hkõt kêp patre maati kaxyw amnhĩ xunhwỳr kêt mẽ. Tĩrtũm kot mẽ kaxyw mẽ unhwỳr jakamã na pre mẽ kaxyw finat Arãwja xãm nhũm kêp mẽ õ patre maati hã mẽ ho Tĩrtũm wỳr o pa.

5Nẽ Kris haxwỳja kêp mẽ panhõ pahi maati hã tãm kot amnhĩ xãm kêt. Tĩrtũm na pre mẽ pakaxyw ãm mẽ tanhmã kãm kapër to mẽ kãm:

Nà apê Ixkra na ka.

Kot paj jarãhã ixpê Anhĩpêêxã hã mẽ kãm amnhĩ jarẽ. Anẽ.

6Nẽ hpãnhã kãm:

Kot kaj Mekijetek pyrã mẽ apê patre maati hã mẽ ho ixwỳr rãhã ho ri apa. Anẽ.

7Jejus kormã pika ja kamã pa ri na pre amnhĩ to Tĩrtũm wỳr rãhã ho pa. Tõhã hkapřĩ mẽ tee ri mẽmoj tã amnhĩ pumu mẽ amnhĩ to kuwỳ. Nẽ tee ri mẽ kot hpĩrta kukamã hamaxpêr mẽ mỳr kãm amnhĩ to kuwỳ. Kop apu Tĩrtũm kãm mẽ kot kêp hpĩr prãm kêt ronhỹx pre tanhmã nê mẽ kãm hkurê xwỳnhjê ho nhũm mẽ hpĩr kêt mẽ. Jakamã nhũm pre ã amnhĩ to hwỳr anẽ. No ãm Tĩrtũm kãm prãm xã hkõt kãm amnhĩ nhĩpêx prãm jakamã nhũm kuma no ãm tanhmã nê mẽ ho hkõt nhũm prem kupĩ.

8Kêp Tĩrtũm Kra kumrêx tã amnhĩ xã htỳx kãm hamak kãm ty. Jao Tĩrtũm kãm hprãm xã hkõt amnhĩ nhĩpêx ã amnhĩ pumunh mex mẽ. 9Na pre amnhĩ xã htỳx kãm hamak o amnhĩ mex o amnhĩ mex ã mẽ kãm amnhĩ to amnhĩrĩt. Jakamã na hte mẽ kot kapër kõt ri amnhĩ nhĩpêx o mẽ pa xwỳnhjê mã mẽ kot amnhĩ nhĩpêx nyw jagjê mẽ nhỹrmã Tĩrtũm mẽ wa kuri mẽ htĩr tũm mẽ mẽ pa mã xwỳnhjê hã mẽ harẽ. 10Jakamã na pre Tĩrtũm Mekijetek pyrã mẽ kêp patre maati kaxyw ãm.

Mẽ pahte Kris kaga nê mẽ pahkurê

Wam Korũt 3.1-2, 13.11, 14.20; Epes 4.11-16

11Nẽ Jejus kêp mẽ pahto Tĩrtũm wỳr xwỳnh maati hã harẽnhja inhãm ixpřĩ hã mẽ amã harẽnh par prãm tã ka mẽ kormã inhmar tỳx kêt mẽ. Pa tee ri ixpřĩ hã mẽ amã harẽnh kapřỳ. Te mẽ amã mar prãm kêt o amõr pyrãk. 12Amnepê mã mẽ ate Kris kõt amnhĩ xunhwỳr mẽ kapêr mar tỳx tã kormã nhãm amnhĩ xõ ri ho amnhĩ kwỳjê jahkre ho ri apa hkêt mẽ. Te mẽ ate hã ano hkêt pyrãk jakamã na pa hte arĩ mẽ amã kapêr

kot amnhîrît mex xwÿnh kwÿ ho mē ajahkre ho pa. No kot amnhîrît mex kêt xwÿnh o mē ajahkre hkêt nē. Te mē hkaràre kot amnhî nhîpêx pyràk o na ka htem amnhî nhîpêx o apa. Na hte mē hkaràre mēõ mex kur kêt nē. ãm kormã katorxà hkà pix kaõ. Ja pyrà nē ãm Tîrtûm kapêr kot amnhîrît mex xwÿnhhta pix na ka mē mar tÿx o apa nom kapêr kot amnhîrît mex kêt xwÿnhja ka mē mar mex kêt nē.

13Nē mē hkaràre kormã Tîrtûm kapêr mar kêt jakamã na htem kormã mēmoj mex nē mēmoj punuj pumunh kêt nē. Tã te mē ate mē kot amnhî nhîpêx pyràk.

14Mē kot Tîrtûm kapêr mar mex xwÿnhjaja na htem hprî hã kapêr piitã mar tÿx nē. Kot amnhîrît mex xwÿnhhta mar tÿx nē määnēn kot amnhîrît mex kêt xwÿnhja nhûm mēhprî hã piitã mar tÿx nē. Te ho mē àptàr kot mēõ mex kur o pata pyràk. Jao ra mē àptàr jamaxpêr o hamaxpêr o ri pa nē hamaxpêr o:

—Kot paj tãm amnhî nhîpêx o ri ixpa nhûm ja inhmã mex nē. Nom kot paj axtem tanhmã amnhî tomnuj to nhûm ja ixpê omnuj nē. Jakamã kot paj tãm amnhî nhîpêx pix o ri ixpa nhûm Tîrtûm mã ja mex nē. Anē.

6 1-2Na pu prem ra Tîrtûm kapêr kot amnhîrît mex xwÿnhhta kwÿ ma. Tãm na ja:

Kris kot mē panê tanhmã amnhî nhîpêx to hã harênhja.

Nē mē pahte amnhî tomnuj kaga hã kot mē pamã karõja.

Nē amnhî kaxyw Tîrtûm kôt mē pajamaxpêr ã mē pamã karõja.

Nē mē pahpê Tîrtûm kra hã amnhî to amnhîrît kaxyw mē kot mē pahkrã kumrãr ã pamã karõja.

Nē mē pahte Tîrtûm mã tanhmã amnhî nhîpêx to ho papa hkukamã mē kot mē pahkrã hã ìhkra jaxwÿr nē mē pahto Tîrtûm wÿr ã mē pamã karõja.

Nē mē pahtyk nē akupÿm mē pahtîr ã mē pajarênhja.

Nē Tîrtûm kot nhÿrmã mē kot amnhî xà htÿx kãm hamak tûm xà hwÿr mē kêp hkra hkêt xwÿnhjê janorja.

Mēmojja piitã pu mē ra harênh mar tÿx nē. Prî hã kot amnhîrît mex. Tã kwa kêr pu mē hpãnhã hijuk ri kot amnhîrît mex kêt xwÿnh kwÿ ma. Jao mē pahpê Tîrtûm kra xàptàr mex nē ri papa. 3Jakamã kwa kêr pu mē kot amnhîrît mex xwÿnh kumrêx kwÿ ma nē hpãnhã hijuk ri kot amnhîrît mex kêt xwÿnh kwÿ ma. Nē axpên mã harênh rãhã ho ri papa. Nã koja Tîrtûm kãm ja prãm pu mē ã amnhî nhîpêx anhÿr rãhã o ri papa.

4-6Na pre ra mē pahkwÿjaja Kris kaga nē htÿx ri amnhî nhîpêx o pa. Mē kot kapêr mar tÿx tã axtem nē hkaga jakamã koja mē axte kapêr mar kêt nē. Ra mē kãm mar prãm kêt. Kot puj mē tee ri axte mē kãm harênh o papa kaprÿ. Na prem hprî hã kuma. Tîrtûm kãm mē ho hkra hprãm ã harênhja nhûm prem hprî hã kuma nē kãm mar prãm nē hkôt amnhî xunhwÿ. Hãmri nhûm Tîrtûm Karõ te mē panhîpêx pyrà nē mē hkarõ

mã agjê nê mẽ kot amnhĩ to mex o pa kaxyw tanhmã mẽ hkrã hto nhũm prem ỹ hã tanhmã kãm amnhĩ nhĩpêx to ho pa. Nê kãm Tĩrtũm kapêr mar prãm nê. Nê axpên mã mex o mex ã harênh o pa. Nê aa mẽ kot mẽmoj pumunh kêt kwỳ pumu nê axpên mã harênh o:

— Nà Krisja ãm hãmri àhpumunh tỳx o àhpumunh tỳx. Koja nhỹrmã akupỹn mẽ pahwỳr wrỳ nê axte mẽ pamã àhpumunh tỳx o amnhĩrĩt pu mẽ omu.

Anhỹr o kapêr tã tanhmã hamaxpêr to nê hkaga. Jakamã te mẽ kot axte Tĩrtũm pê Krata pĩ hã nhôr nê hpĩr pyræk. Nê te mẽ piitã mẽ noo mã tanhmã haprỳ hto nê tanhmã kãm kapêr punuj to pyræk. Jakamã kot pu mẽ tee ri akupỹm tãm mẽ unhwỳr prãm kaprỳ.

7Na hte Tĩrtũm mẽ pahto mex rãhã ho pa. Jao mẽ pamã mẽ pahpur ã na rê pu mẽ kamã panhõ rũnh nê. Jakamã mẽ kot amnhĩ kaxyw Kris kôt hamaxpêr nê hkôt amnhĩ xunhwỳr prãm xwỳnhjaja te mẽ hpur mex nê kamã mẽmoj ô rũnh pyræk. Nê uræk nê amnhĩ to mex o pa. 8Nom koja mẽ hpur kãm mẽmoj nhĩgrôt mex kêt japêr. Kamã mrônhi nê kahpare nê mẽmoj punuj pix hapôj nhũm mẽ tee ri omu nê hkaga kurê kumrêx. Tã mẽ kot Kris kaga xwỳnhjaja te pur punuj kot amnhĩ nhĩpêxta pyræk nhũm Tĩrtũm te kêp pur nhõ dôn pyræk. Jao tee ri amnhĩ tã mẽ kot amnhĩ nhĩpêx ã mẽ omu nê mẽ hkaga kurê kumrêx nê ma mẽ kot amnhĩ xà htỳx kãm hamak tũm xà pê kuwyta wỳr mẽ rênh pa.

9E ixkrãmnhwỳjaja. Inhmã mẽ akĩnh jakamã na pa ã mẽ amã mẽ kot Kris kaga xwỳnhjê jarênh anê. Nom te mẽ ate mẽ uræk kêt. Kris kôt mẽ ate amnhĩ xunhwỳr xwỳnh mex na ka mẽ. Ra mẽ ate hkôt amnhĩ xunhwỳr tỳx jakamã te mẽ apê pur mexta pyræk. 10Na ka htem Kris kôt mẽ akwỳjê ho mex o ri apa. Te mẽ amã amnhĩ tã ma pyræk o axpên nhĩpêx o ri apa nhũm Tĩrtũm ja hã mẽ apumu. Tã koja tanhmã ja hã mẽ ato mex to. Kot tãm mẽ panhĩpêx o pa jakamã koja tanhmã mẽ ate axpên nhĩpêx mex tota ã tanhmã mẽ ato mex to.

11Tã kêr ka mẽ arĩ ã axpên nhĩpêx anhỹr o ri apa rãhã ty kê nhỹrmã ja hã mẽ ato mex nê. ã mẽ ate amnhĩ nhĩpêx anhỹr o apaja na inhmã hprãm tỳx kumrêx. 12Kot kaj mẽ ã amnhĩ nhĩpêx anê hãmri nê amã kaga nê apa hkêt nê. Nê amnhĩ nhĩpêx o te Tĩrtũm kra hkwy htyk xwỳnhjaja kormã htĩr ri kot amnhĩ nhĩpêxta pyræk. Na prem amnhĩ kaxyw Tĩrtũm mã hamaxpêr tỳx rãhã ho pa. Kot mẽ ho mex ã mẽ hã amnhĩ jarênhja nhũm prem amnhĩ tã kamã hamak rãhã ho pa. Tã amnhĩ tã kamã hamak o pa ry rax rãhã ty nhũm Tĩrtũm ra kot mẽ hã amnhĩ jarênh xà hkôt mẽ ho mex nê. Tã kêr ka mẽ uræk nê ã amnhĩ nhĩpêx anhỹr o ri apa rãhã ty. 13-15 ã na pre finat Apraãwja amnhĩ nhĩpêx anê. Kormã hkra hkêt tã nhũm Tĩrtũm kãm hkra nê kanrêhã htãmnhwỳjê hkukamã tanhmã mẽ harênh to nê kãm:

— Pa Apraãw. E inhma. Kot paj aprõ mẽ war ato mex nê. Kot kaj war akra hãmri nê gaa nhũm akanrêhã war atãmnhwỳjaja ohtô rax kumrêx. Âm hãmri na pa ã mẽ hkukamã amã mẽ harênh anê. Kot paj amã amnhĩ jarênh xà hkôt ã anhĩpêx anê. Ixpê mẽ anhĩpêx xwỳnh na pa ã amã amnhĩ jarênh anê. Anê.

Tã ã kãm wa hkra jarênh anhỹr tã nhũm wa tokyx hkra hkêt nê. Nom tee ri ja hã amnhĩ pumu nê Tĩrtũm kot wa kãm hêx ã hkamnhĩx kêt nê. Âm hkamnàr rom ã hamaxpêr anê nê hamaxpêr o:

— Nà kot paj wa nhỹrmã ixkra. Tĩrtũm tãm kot wa inhmã wa ixkra jarênh kênã. Anê.

Tã nhũm amgrà sohtô rax kumrêx nê hapêx nhũm wa hkra. Nhũm axte amgrà hkwy hapêx nhũm wa hkanrêhã htãmnhwỳ hkwy. Ra Tĩrtũm kot mẽ hkukamã Apraãw mã mẽ harênh xà hkôt. Tĩrtũmja hihtỳx o hihtỳx nê àhpumunh o àhpumunh jakamã na pre amnhĩ jarênh xà hkôt ã wa kãm wa hkra nê wa htãmnhwỳjê nhôr anê. Kot ra wa kãm hã amnhĩ jarênh xà hkôt. No ri nhãm mêhõ nhĩxi jarênh kôt wa kãm wa hkra jarênh kêt nê. Mêhõ kot we hihtỳx o hihtỳx o Tĩrtũm jakre nhũm we ri hixi jarênh kôt ã wa kãm mẽ harênh anê? Amrakati kumrêx. Jakamã na pre wa kãm amnhĩ jarênh o:

— Nà ixàhpumunh xà hkôt na pa ã war amã war akra jarênh anê. Anê.

16No pika ja kamã na htem ã amnhĩ jarênh anhỹr kêt nê. Na htem mêhõ mã tanhmã mẽmoj tã amnhĩ jarênh to kaxyw nê mêhõ hihtỳx o kot hakrenh xwỳnh nhĩxi jarênh kôt amnhĩ jarê. Nê amnhĩ jarênh o:

— Nà ixte jahti noo mã ã amã amnhĩ jarênh anhỹr jakamã âm hãmri na pa ã amnhĩ jarênh anê. Anê.

Kot hã amnhĩ to hêx nhũm hihtỳx o kot hakrenh xwỳnhnta kot hã harênh mar nê hã tanhmã homnuj to pymaj na htem ã mẽ hixi jarênh kôt mẽmoj tã amnhĩ jarênh anê. Hãmri nê kot tanhmã hã ho pymaj ra kot amnhĩ jarênh xà hkôt tanhmã mẽmoj nhĩpêx to. **17**Nom Tĩrtũm na hte uràk nê nhãm mêhõ nhĩxi jarênh kôt ri mẽmoj tã amnhĩ jarênh kêt nê. Na hte tãm amnhĩ jarênh xà hkôt mẽmoj to anê nê aa hã amnhĩ to hêx kêt nê. Na pre mẽ pahpê hkrajê mã kãm:

— Kot paj nhỹrmã mẽ ato mex rax nê. Âm hãmri na pa mẽ amã amnhĩ jarê. Ixte amnhĩ pumunh xà hkôt na pa ã mẽ amã amnhĩ jarênh anê. Anê.

Mê pahte âm hãmri kot amnhĩ jarênhja mar nê amnhĩ to hêx kêt ã omunh kurê kumrêx kaxyw. Koja Tĩrtũm mẽmoj tã ã amnhĩ jarênh anê hãmri nê hijuk ri axtem hpãnhã tanhmã amnhĩ jarênh to hkêt nê. **18**Jakamã koja nhỹrmã ma amnhĩ wỳr mẽ pahto àpir ã amnhĩ jarê hãmri nê âm hãmri amnhĩ jarê nê amnhĩ jarênh o:

— Nà âm hãmri ixte amnhĩ pumunh xà hkôt na pa mẽ amã ja hã amnhĩ jarê. Anê.

Koja ã amnhĩ jarênh anê hãmri nê hijuk ri axte hpãnhã tanhmã mêmoj jarênh to hkêt nê. Ra kot ã amnhĩ jarênh anhÿrja koja arĩ rãhã nê. Jakamã e kwa kêr ka mẽ tee ri amnhĩ kukamã ajamaxpêr o ri apa hkêt nê. Ra mẽ pamex nê ri papa kaxyw Tĩrtũm kôt amnhĩ xunhwÿr jakamã kêr pu mẽ arĩ kot mẽ pahto mex rax xà hã arĩgrota jamãr rãhã ho ri papa.

19Na hte kanôre ho htÿx xàja kanôre ho htÿx nhũm ma gô hkôt pa hkêt nê. Ja pyrã nê kot puj mẽ Tĩrtũm kot mẽ pahto mex xà kamã pajamak o papa hãmri nê hkaga hkêt nê.

Amnepê mã na pre hte mẽ panhõ patre maatija Tĩrtũm mã amnhĩ jarênh xà hã ixkre hwÿr agjê nê hkôt ã kupêxê ho hitom maati hwÿr agjê nê kamã mẽ ho Tĩrtũm wÿr o kuhê. Tã nhũm Jesus akupÿm kaxkwa hwÿr api nê Tĩrtũm ri hkrĩ hãmri nê patre maatita pãnhã tãm mẽ pahto hwÿr o hkrĩ. 20Na pre ra mẽ pakukamã kaxkwa hwÿr api nê kamã pa ho pa nê finat Mekijetekja pyrã nê kêp mẽ panhõ patre maati. Tã koja mẽ pahto Tĩrtũm wÿr rãhã nê pa ho pa.

Patre Mekijetek jarênh

7 1-3E kot paj ixprĩ hã mẽ amã tanhmã finat Mekijetekja jarênh to ka mẽ inhma. Krĩ pê Sarê kamã na pre kêp mẽ õ pahi nê mãânên kêp mẽõ patre. Sarêja mẽ pakapêr kãm kêp: “Mê hamakêtkati nê ri mẽ pa xwÿnhjê nhõ krĩ.” Jakamã Mekijetekja mẽ pakapêr kãm kêp: “Mê hamakêtkati nê ri mẽ pa xwÿnhjê nhõ pahi.” Nê mãânên kêp: “Pahi kot tãm amnhĩ nhípêx o pa xwÿnh.” Nê Mekijetek nhípêxã nê katorxã nê higêt nhixija mẽ pahte harênh mar kêt. Nê kator ã arĩgro nê htyk ã arĩgroja mãânên mẽ pahte harênh mar kêt. Tĩrtũm kapêr ã kagã htũm kot tanhmã ja jarênh to hkêt. ãm Jesus pyrã nê kêp patre hã mẽ ho Tĩrtũm wÿr rãhã ho pa xwÿnh pix ã kot harênh. ãm ja pix na mẽ pahte harênh mar. Nê kot amnhĩ to rax xwÿnh jakamã na pre Apraãw nhÿri omu nê hã hpijaãm kaxyw kãm hikukrêx kwÿ gô. Na pre hkwÿjê mẽ ra mẽ urojê kutã amnhĩ xunhwÿr nê pijapu nê mẽ kêp mẽ õ pahi ho 4 nê mẽ himex. Nê mẽ kêp mẽ hikukrêx kwÿptã nê hamÿ nê ma õ krĩ hwÿr o mõ. Nê kormã pry hã môr ri Mekijetek kaxpa nhũm amnhĩ wÿr omu nê kãm:

— Pa Apraãw? E kê Tĩrtũm ato mex nê ka amex nê apa. Anê.

Nhũm amnhĩ tã kuma nê hkĩnh nê. Hãmri nê kãm mẽ hikukrêx kwÿptãr xwÿnhhta hkwÿ gô nhũm hamÿ nê ma amnhĩm o mõ. 4Na pre Apraãw kot amnhĩ to rax ã omu nê kãm mêmojta kwÿ gô. Kêp mẽ pahpê Ijaew pãr krax jakamã mãânên kot amnhĩ to rax tã Mekijetekja urãk nê kot amnhĩ to rax ã omu nê kãm mêmota kwÿ gô. 5Finat Mojes kot Ijaew mã Tĩrtũm kapêr jarênh xà hkôt kãm kugô. Na pre mẽ kãm:

— Mê akwÿ pê finat Rewi hkanrêhã htãmnhwÿjaja kêp mẽ anhõ patre jakamã kêr ka mẽ kãm mẽ akukrêx kwÿ nhôr o ri apa. Kot kaj mẽ

akrit kêp 10 nê kãm ho pixi nê agõ. Nê mẽ akàxpore kêp 10 nê kãm hõ gõ. Kêr ka mẽ ã mẽ kãm mẽ akukrêx nê mẽ akrit kwỳ nhõr o apa anê. Nê kêr ka mẽ kãm mẽmoj mex pix gõ. Mẽ kêp mẽ akwỳ na mẽ. Mẽ apiitã mẽ apê Apraãw kanrêhã htàmnhwỳ jakamã kêr ka mẽ ã mẽ hipêx anhÿr o apa. Anê.

6Tã Mekijetekja kêp Rewi hkwỳ hkêt tã nhũm Apraãw amarĩ ã hipêx anê nê kãm pahi htyk xwỳnhjê kukrêxta kwỳ gõ. Jao hikukrêxta kamã mẽmoj kêp 10 nhũm omu nê kamã kãm ho hpÿnh nê kugõ. Na pre ã kãm mẽmoj nhõr anê. Hãmri nhũm amnhĩm hamỳ nê kãm:

— Nà ãm hãmri koja Tirtũm ato mex rax nê. Anê.

Ra Tirtũm kot Apraãw kanrêhã kãm htàmnhwỳ ho ohtô nê mẽ hkukamã mẽ harênh jakamã nhũm Mekijetekja ã kãm Tirtũm kot ho mex ã harênh anê. 7Mẽ kot amnhĩ to rúnh o mẽ hakrenh xwỳnh pixjaja Tirtũm kot mẽ ho mex kaxyw mẽ ho àhwÿr o pa jakamã na pre Apraãw o Tirtũm wỳ. Jao kot amnhĩ to rax o kot hakrenh ã amnhĩ to amnhĩrit. 8Hãmri nê Rewi hkanrêhã htàmnhwỳ kot amnhĩ nhĩpêx pyrã nê Apraãw o Tirtũm wỳ nê kêp mẽmojta jamỳ. Mẽ uràk nê mẽmoj kamã kêp 10ja rũm ho hpÿnh nê amnhĩm hamỳ. Nom kot amnhĩ to rax o Rewi hkanrêhã htàmnhwỳjê jakrenh. Tirtũm kapêr ã kagã htũm kot Rewi hkanrêhã htàmnhwỳjê htyk par ã mẽ harênh tã tanhmã Mekijetek htyk ã harênh to hkêt jakamã kot amnhĩ to rax o kot Rewi hkwyjê jakrenh.

9-10Nê kot pry kamã Apraãw kaxparta ã kormã Rewi kator kêt tã kêp Apraãw kanrêhã htàmnhwỳ mã xwỳnh. Jakamã nhũm Apraãwja Mekijetek mã mẽ hikukrêxta kwỳ nhõr jao te Rewi mã õr pyrãk. Tã nhũm amgrã xohtô nê hapêx nhũm Rewi hkanrêhã htàmnhwỳjajaja hapôj nê kêp mẽ õ patre nê ri pa. Jao Mekijetek pyrã nê mẽ kêp mẽ hikukrêx kwỳ jamÿnh o ri pa.

11Nê finat Mojes na pre Ijaewjê mã tanhmã Rewi hkanrêhã htàmnhwỳjê jarênh to. Kormã mẽ hapôx kêt ri nhũm hkwyjê mã tanhmã mẽ harênh to. Mẽ kêp patre hã mẽ harê. Tã nhũm mẽ hapôj nê hprêk nê mẽ ho Tirtũm wÿr o ri mẽ hkôt pa. Nom mẽ kot tãm amnhĩ nhĩpêx o pa kaxyw na prem tanhmã mẽ hkrã hto hkêt nê. Tanhmã kot mẽ amnhĩ to nê ã mẽ hipêx anê? Jakamã nhũm Tirtũm mẽ hpãnhã mẽ pahwÿr kÿj rũm mēhõja mẽ nhũm mẽ pahwÿr wrỳ. Nom kêp Rewi hkanrêhã htàmnhwỳ hkêt. Nê mãânên kêp Rewi hpãm Arãw kanrêhã htàmnhwỳ hkêt. Axtem te Mekijetek kot amnhĩ nhĩpêx pyrãk xwỳnh na pre. Jejus Krisja. Tãm na pre mẽ pahwÿr wrỳ hãmri nê tanhmã mẽ pahkrã hto pu mẽ ÿ hã tãm amnhĩ nhĩpêx o papa. 12No Mojes kapêr kot Rewi hkanrêhã htàmnhwỳ pixjaja kêp mẽ ho Tirtũm wÿr xwỳnh ã mẽ harênh. Tã nhũm Krisja mẽ pahwÿr wrỳ nê mẽ hpãnhã kêp mẽ pahto àhwÿr o pa xwỳnh. Jakamã na pu htem axte Mojes kapêr kôt amnhĩ nhĩpêx kêt nê. Pãnhã Jejus kapêr kôt pix mã amnhĩ nhĩpêx o papa.

13-14Nê Jejus kêp Rewi hkanrêhã htâmnhwÿ hkêt. Katorxà hkôt kêp Apraãw tàmnhwÿ Juta hkanrêhã htâmnhwÿ na pre. Ra mē pahte ja mar mex. Aa Juta hkanrêhã htâmnhwÿjaja kêp patre hkêt. Na pre Tirtûm jajê mã mē kot mēmoj nhôr xà hã mēsti kunih̄tita ã kãm mēmoj nhôr nê hkwÿjê ho hwÿr ã mē kãm karõ hkêt nê. ãm Apraãw tàmnhwÿ Rewi hkanrêhã htâmnhwÿjê mã pix mã na pre ã mē kãm ja hã karõ anê. Tã nhûm Jejus wrÿ nê mē hpãnhã mē pahto hwÿr o pa. Mē uràk nê kêp Rewi hkanrêhã htâmnhwÿ hkêt axtem kêp Juta hkanrêhã htâmnhwÿ htã Rewi hkwÿjê hpãnhã mē pahto Tirtûm wÿr o pa.

Mekijetek pyrã nê mē pahto Tirtûm wÿr xwÿnh jarênh

15-19Nê Ijaewja na prem Mojes kapêr mar tÿx nê hkôt amnhĩ nhĩpêx tã aa amnhĩ to mex kêt nhûm Tirtûm tee ri ja hã mē omu nê hamaxpêr o:

— Nã Rewi hkanrêhã htâmnhwÿjaja kêp mē õ patre nê mē ho ixwÿr o pa htã nhûm mē arĩ htÿx ri amnhĩ tomnuj pix o pa. Jakamã koja mē axte ri mē ho ixwÿr o pa hkêt nê. Anê.

Hãmri nê mē pakaxyw mē pahto àhwÿr xwÿnhja ta nê ãm. Kra Jejusja nhûm kuta nê ãm. Tãm na hte Rewi hkwÿjê rom tanhmã mē pahkrã hto pu mē kukwak ri tãm amnhĩ nhĩpêx nê Tirtûm kôt amnhĩ nhĩpêx mex nê. Jao nhÿrmã ma mē pahte Tirtûm nhõ krĩ hwÿr paxàpirja jamãr o papa.

Jejus na hte Mekijetek pyrã nê kêp mē panhõ patre maati nê mē pahto Tirtûm wÿr rãhã ho pa. Kêp Rewi hkanrêhã htâmnhwÿ hkêt tã Tirtûm pyrã nê kêp htĩr tûm nê pa ho pa xwÿnh jakamã na pre Tirtûmja mē pakaxyw kuta nê mē pahwÿr kumê. Kapêr ã kagã htûm kot harênh kot:

Kot kaj Mekijetek pyrã nê mē ho ixwÿr rãhã ho ri apa. Anê.

20-21No Rewi hkwÿjê mã na pre ã kapêr anhÿr kêt nê. ãm Jejus pix mã ã kapêr anê nê kãm:

E kot kaj apê mē ho ixwÿr rãhã o apa xwÿnh. Kot paj nhÿrmã apãnhã axtem mēhõ xãm kêt nê. ãm kapxipix kot kaj mē ho ixwÿr o apa rãhã ho rãhã. ãm hãmri na pa amã ã ixkapêr anê. Ixpê Pahi Maati hã ã ajarênh anê.

22Anhÿr jao Jejus kot amnhĩ to rax o Rewi hkwÿjê jakrenh par ã ho amnhĩrĩt. Mē kot Ijaew mã Tirtûm kapêr jarênh nhûm mē kot mar nom hkôt amnhĩ nhĩpêx kêt jakamã nhûm Tirtûm mē hpãnhã Jejus xãm. Tapxipix na hte tanhmã mē pahkrã hto pu mē tãm amnhĩ nhĩpêx mex o ri papa. 23Rewi hkwÿjaja na prem axpên mÿr pê kêp mēõ patre nê ri pa htã htyk pa nê hapêx. 24Nom Jejusja htĩr tûm nê pa ho pa xwÿnh jakamã koja mē uràk nê aa hapêx kêt. Kojã mē pahto Tirtûm wÿr rãhã ho pa nê aa jam urer kêt nê. 25Ã Jejus kot amnhĩ nhĩpêx anhÿr jakamã te kêp

Tĩrtũm wỳr mẽ panhõ pry pyræk. Na pu htem hkõt amnhĩ xunhwỳ nhũm mẽ panê mẽ pahte amnhĩ tomnuj piitã rênh pa nê mẽ pahpê Tĩrtũm kra hã mẽ pajarê.

26 Nê ãm hãmri kêp mẽ pahto Tĩrtũm wỳr xwỳnh maati mex na. Mẽ pakurom tãm kot amnhĩ nhĩpêx mex o pa nê aa kot tanhmã amnhĩ tomnuj to hkêt. Tã ra Tĩrtũm kot amnhĩ wỳr ho àpir jakamã nhũm ra kuri mẽ pahto hwỳr rãhã ho pa. 27 Nê kot amnhĩ to rax o wam mẽõ patre maati jê jakrenh. Wamtaja na prem hkwyjê pyrã nê amnhĩ tomnuj o pa. Jakamã na prem apkati mẽ amnhĩ tomnuj pãnhã Tĩrtũm mã mẽmoj gõ nê kãm amnhĩ jarê nê amnhĩ to kuwỳ. Hãmri nê rĩ kormã kot nhãm mẽ hwỳr mẽ mrar xwỳnhjê mã mẽ ho anê nê mẽ hpãnhã Tĩrtũm mã mẽmoj nhõr pê mẽ ho kuwỳ. No kêt Jejusja wam patre maati rom aa kot amnhĩ tomnuj kêt jakamã na pre hte mẽ uræk nê amnhĩ tomnuj pãnhã Tĩrtũm mã mẽmoj nhõr o pa hkêt nê. ãm mẽ papajaja na pre mẽ pahte amnhĩ tomnuj pãnhã htyk o kãm amnhĩre. ãm htyk tipxi htã mẽ pahpiitã mẽ pahpãnhã amnhĩrer pa. Jakamã koja axte ã amnhĩ nhĩpêx anhỳr kêt nê. Mo kaxyw kot kêt axte mẽ panê ty?

28 Mojes kapêr kõt na pre Ijaew amnhĩm Rewi hkwyjê xunhwỳ nhũm mẽ kêp mẽ õ patre nê ri pa. Tã no nhũm mẽ uræk nê arĩ amnhĩ tomnuj o pa nhũm Tĩrtũm tee ri mẽ omu nê mẽ hpãnhã mẽ pakaxyw Krata xãm nê kãm:

— Nã kapxipix mẽ kurom ate tãm amnhĩ nhĩpêx o apa jakamã kapxipix kot kaj mẽ hpãnhã mẽ ho ixwỳr o apa rãhã ho rãhã. Anê.


Jejus kêp mẽ pahto Tĩrtũm wỳr xwỳnh maati hã harênh

Rukre 22.20; Sikũn Korĩt 3.6-11

8 1 E kot paj axtem tanhmã mẽ amã mẽ pahto Tĩrtũm wỳr xwỳnh maati jarênh to ka mẽ inhma. Na hte kaxkwa kamã Tĩrtũm nhĩhkõ hã hkrĩ. Ĩhkõ hã kêp Pahi Maati hã hkrĩ xà hã upõk rũm hkrĩ ho hkrĩ. 2 Wam patre maati jaja na prem Tĩrtũm nhõrkwỹ kaàkre wỳr mra nê kamã hitom maati kamã mẽ ho Tĩrtũm wỳr o pa. Nom nhũm Jejus na hte mẽ kurom kaxkwa kamã Tĩrtũm nhõrkwỹ mex kãm mẽ pahto àhwỳr o hkrĩ. Òrkwỹ kaàkreja na prem ĩhkra ho hipêx nom kaxkwa kamã òrkwỹ mexja na pre mẽhõ ĩhkra ho hipêx kêt nê. Tĩrtũm na pre tanhmã hipêx to nhũm kamã Jejusja mẽ pahto hwỳr o hkrĩ.

3 Nê mẽ pahpê Ijaew nhõ patre maati jaja na prem mẽ ho hwỳr kaxyw nê mẽ kot amnhĩ tomnuj pãnhã Tĩrtũm mã mẽmoj nhõr kõt mẽ ho kuwỳ. No Kris na hte ã amnhĩ nhĩpêx anhỳr kêt nê. Ra htyk o kot kãm amnhĩ nhĩ nhõr jakamã na hte wam patre maati pyrã nê xatã kãm mẽmoj nhõr kêt nê.

4 Tã na hte arĩ Ijaew Mojes kapêr kõt amnhĩm Rewi hkwyjê kêp mẽ õ patre kaxyw mẽ unhwỳ nhũm mẽ ho Tĩrtũm wỳr o pa. No Jejus kêp Rewi



Eprêw 8.5-6

hkanrêhã htàmnhwý hkêt. Katorxà hkôt kêp Juta hkanrêhã htàmnhwý jakamã kop apu arí jar pika ja kamã htír nê pa ronhýx Ijaew nhõ patre pyrã nê kêp mê ho Tirtúm wýr o pa xwýnh kêt. Am Rewi hkanrêhã htàmnhwý pixjaja na htem mê kaxyw kãm mêmoj gô nê hkôt mê ho kuwý. 5Jar na htem arí ã amnhĩ nhĩpêx anhýr o pa nom kaxkwa kamã na htem ã amnhĩ nhĩpêx anhýr hkêt nê.

Nê jar Tirtúm nhõrkwý kaàkreja te kot kaxkwa kamã õrkwý mexta pyrãk. Na pre Mojes õrkwý kaàkre nhĩpêx kaxyw nhúm Tirtúm tanhmã kãm hã karõ hto nê kãm:

—E jáã hixêt prêk nhĩmõk ã axãmta ã na pa pre amã ixkreta kukamã ixprĩ hã tanhmã mê ate hipêx to hã amã karõ. Tã kêr ka ã hipêx anê. Anê.

Hãmri nhúm kuma nê kot kãm hã karõ xà hkôt hipêx. Hãmri nhúm mê õ patre maati ixkreja kamã mê ho Tirtúm wýr o pa. Na prem ã amnhĩ nhĩpêx anhýr o pa.

6Tã nhúm ra Tirtúm axtem mê hpãnhã mê pakaxyw Kris xãm nhúm hte mê pahto hwýr mex o wantajê jakre. Na hte kaxkwa kamã mê pahpiitã mê pahpumunh mex rãhã ho hkrĩ nê wantajê rom tanhmã mê pahkrã hto pu mê tãm amnhĩ nhĩpêx o ri papa. Tirtúm kot finat Mojes mã kapêrja mex nê nom axtem na pre. Tã kapêr nyw na mex o kot wam kapêr jakrenh. Kapêr nyw kôt kot puj mê pahtyk tã akupým pahtír nê nhýrmã Tirtúm mê Jejus wa kuri pamex nê pahtír tùm nê papa ho papa nê axte pahtyk kêt nê. 7Kêp apu Tirtúm kot Mojes mã kapêr kôt mê kot tãm amnhĩ nhĩpêx o pa ronhýx pre Tirtúm axte kapêr nyw ã kaga hkêt nê. 8Nom wam kapêr tũmta na pre mê mar týx htã arí amnhĩ tomnuj rãhã ho pa nhúm tee ri ja hã mê omu nê mê kãm:

Nà kot paj axte nhÿrmã mẽ apê Ijaew mã axtem tanhmã ixkapêr to.

9 Amnepêm mẽ anhîgêtjê mã na pa pre ixkapêr.

Na pa pre Ejit pê mẽ kator nê mẽ kot tanhmã amnhĩ nhîpêx to ho pa kaxyw tanhmã hã mẽ kãm karõ hto.

Nom na prem ixkapêr ma nê ãm kuma nê ixkôt amnhĩ nhîpêx kêt nê. Pa tee ri ja hã mẽ omu hãmri nê mẽ hkaga.

10 Tã kot paj mẽ apê mẽ hkanrêhã mẽ htãmnhwÿ nywjê mã axtem ixkapêr ka mẽ ixkapêr nywja ma.

Kot paj nhÿrmã tanhmã mẽ akrã hto ka mẽ ixkapêr nyw mar tÿx nê hã ano htÿx nê ho apa.

Nê akính nê apa.

Nê ixkôt ri amnhĩ nhîpêx mex o apa.

Nê axpên mã ijarênh o: “Nà ãm hãmri Tirtũm kêp mẽ panhõ Tirtũm na.” Anhÿr o ri axpên mã ijarênh o apa.

Pa amnhĩ tã mẽ ama nê mẽ apumu nê amnhĩ xwar mẽ apê ixkra hã amnhĩm mẽ ajarê.

11 Kot kaj mẽ apiitã ixte amnhĩ nhîpêx kôt ixpumunh mex o ri apa.

Mê akàxpore rũnh xwÿnhjaja nê mẽ akàxpore hkryre

xwÿnhjaja mẽ apiitã ixpumunh mex jakamã kot kaj mẽ ri axte ixtã tanhmã axpên kukjêr to ho ri apa hkêt nê.

12 Nê kot paj mẽ ato mex rax o ixpa.

Nê axte tanhmã mẽ ate amnhĩ tomnu hto ho apaja mã ijamaxpêr kêt nê. Anê.

13 Nê koja mẽmoj ra htũm hãmri nê hapêx tokyx anê. Ja pyrã nê na pre Tirtũm mẽ pamã kapêr tũmta jarênh o:

— E kêr ka mẽ axte ixkapêr tũm mar kêt nê. Pãnhã ixkapêr nyw pix mãn mar o apa nê ãm kôt pix mã mãn amnhĩ nhîpêx rãhã ho ri apa. Anê.

Tirtũm nhõrkwÿ kaàkre jarênh

9 1 Nê amnepêm na pre finat Mojesja mẽ panhîgêt nê mẽ pahpãmjê mã tanhmã Tirtũm nhõrkwÿ kaàkre jarênh to. Tanhmã mẽ kot hipêx to nê kamã tanhmã amnhĩ nhîpêx to hã mẽ kãm karõ. Nê kamã tanhmã mẽ kot amnhĩ to Tirtũm wÿr to hã mẽ kãm karõ. Nê tanhmã mẽ hkwyjê ho hwÿr toja nhũm pre mãânên mẽ kãm hã karõ. No Tirtũm nhõrkwÿ kaàkreja kêp õrkwÿ kumrêx kêt. ãm mẽ kot omunh nê kaxkwa kamã õrkwÿ kumrêx mã hamaxpêr kaxyw na pre. 2 Jakamã nhũm prem Mojes kapêr ma nê hipêx. Kamã hitom hamêxkrut. Wam hitom kamã na pre kanê hprêeti xãm nê kutã mêsti xãm. Nê mêsti nhĩmõk ã Tirtũm mã õ pãwti jaxwÿ. Mẽ panhõ patre na pre htem Tirtũm mã kugõ nê mêsti ã kãm haxwÿ hãmri nê hkwyjê ho kuwÿ. Tã hitom ja na prem kêp Tirtũm nhõ hitom mex ã harê.


3-4 Nê hitom wa hkaêx kãm na pre kupêxê ho hakwakre kahê xàja ajêt. Haturxà kamã hitomja na prem Tirtùm nhõ hitom maati hã harê. Tirtùm na pre te hirã htÿx kãm hwÿr wrÿ nê te kamã hkrÿ pyrãk. Nê kamã na pre Tirtùm mã mêhkuxwa xà ho xêt xà hã mês kunihitja kuhê. Na prem ôr o hipêx nê kamã ãm nhùm kuhê. Nhùm pre hte mễõ patre hwÿr agjê nê kutã kuhê nê mễ ho Tirtùm wÿ. Nê mês kunihiti haxwÿja hitom maati kamã kuhê. Na prem pÿ ho hipêx nê ôr o hpro nê kamã ãm. Mêstija kaxwÿnh kãm na pre htem mễmoj jagjê.

Tirtùm kot Ijaew mã tanhmã mễ kot amnhÿ nhÿpêx to ho pa hã karõ nê kên po hã mễ kãm hã kagàja nhùm prem kamã kuxà nhùm hikwÿ.

Nê mãânên ôr o xijereja xà nhùm hikwÿ. Nê xijere kamã amnepê mã Tirtùm kot kaxkwa rùm mễ hwÿr mễõ rênh kwÿ hikwÿ. Mễõja mễ kot kãm: “Manã” anhÿr xwÿnhja na prem hkwyê hkawrà nê xijere kamã kugjê hãmri nê mễsti kamã kuxà.

Nê finat Arãw nhõ kô kot ho amnhÿ kaxpar xà htũmta nhùm prem kamã kuxà. Tirtùm kot tanhmã ho nhùm kurùm pixôrà muxre hapôx xwÿnhhta nhùm prem mãânên mês kunihiti kamã kuxà nhùm hikwÿ.

5 Nê himök ã Tirtùm kapêr o wrÿk xwÿnh wa hkarõ nhÿpêxja wa hamêxkrut nê axpên kutã wa hkôn krã ho hkrÿ. Axpên wÿr hara koror nê wa hkrÿ. Patre maati kot omunh nê Tirtùm kot mễ hkôt pa ho paja mã hamaxpêr kaxyw. Nê wa hkaêx kãm ahkaprÿja Tirtùm kot mễ nê mễ kot amnhÿ tomnuj rênh mã hamaxpêr xà na pre.



Eprêw 9.2

Ã Tirtûm nhõrkwỹ kaàkre kot anhÿr. No kot paj ixprĩ hã mẽ amã piitã harênh par kêt nê. 6Na pre hte mẽõ patre apkati mẽ wam hitom wÿr agjê nê kamã Ijaew ho Tirtûm wÿr o pa. 7No hitom maatiã am mẽ õ patre maati pix na pre hwÿr agjê. Nom apkati mẽ hwÿr pa nê gjêx kêt am amgrã pÿnh kãm hwÿr gjêx pÿnh nê. Nê hwÿr gjêx kaxyw nê mẽmo mry pa nê hkamrô ru nê o pa nê hitom maati hwÿr ho agjê. Hãmri nê ho mẽs kunihti nhĩmõk kamĩ nê Tirtûm mã kãm:

—Pa Tirtûm. E ota mry kamrôta. Mẽ ixpê akwÿjaja mẽ ixte amnhĩ tomnuj jakamã na pa mẽ amnhĩ pãnhã mẽmo mry nhõkre jakã nê kupĩ nê hkamrô ru nê man awÿr o mra. Te kot mẽ ixte amnhĩ tomnuj mÿrapê htyk pyrãk. Jakamã kwa ã mẽ ixte amnhĩ nhĩpêx anhÿrja ã mẽ ixpumunh hkõt mẽ inhnê mẽ ixte amnhĩ tomnuj rê.

Anhÿr o mẽ amnhĩ to kuwÿ. 8Nê patre maati pix na pre hitom maatiã wÿr agjê nê mẽ ho Tirtûm wÿ. Ijaew na prem ixkre kapem hamãr o kuhê nê hwÿr gjêx kêt nê. Tirtûm Karõ kot hã mẽ kãm karõ xà hkõt. Te Tirtûm pê amÿm kuhê pyrãk. Tã na htem jarãhã arĩ Ijaew kanrêhã mẽ hkra nê mẽ htãmnhwÿjaja ã amnhĩ nhĩpêx anhÿr o pa. Jao mẽ higêjtê pyrã nê Tirtûm pê amÿm kuhê.

9Mẽ kot arĩ Tirtûm mã mry hpar nê hkamrô ho mẽmoj kamĩr nê amnhĩ to hwÿr o pa htã na htem arĩ hamaxpêr punuj pix o pa.

10Tirtûm kapêr tũm kot tanhmã mẽmoj tã mẽ kãm karõ hto.

Na pre tanhmã mẽ apkur xà hã mẽ kãm karõ hto nhũm htem pix kur o pa.

Nê tanhmã mẽ hkõm xà hã mẽ kãm karõ hto nhũm htem pix o hkõm o pa.

Nê tanhmã amnhĩmnuj to hã tanhmã mẽ kot amnhĩ kuhõnh to hã karõja nhũm htem hkõt pix mã tanhmã amnhĩ kuhõnh to ho pa.

Nê tanhmã mẽ kot ri mẽ hikukrêx kuhõnh to hã mẽ kãm karõja nhũm htem kõt pix mã tanhmã kuhõnh to ho pa.

Ã na pre Tirtûm Kris kukamã mẽ kãm mẽmoj tã karõ rax anê. Kris kutêp pix mã ã mẽ kot amnhĩ nhĩpêx anhÿr kaxyw. No mẽ pahte arĩ ã amnhĩ nhĩpêx anhÿr kaxyw kêt. Na pre ra Kris mẽ pahwÿr wrÿ nê Tirtûm kapêr tũm o hapêx nê hpãnhã mẽ pamã kapêr nyw jarê pu mẽ hpãnhã nywta kõt pix mã amnhĩ nhĩpêx o papa. Kapêr nywja mex o mex. Nê mex o wamta jakrenh.

Kris htyk o mẽ pahte amnhĩ tomnuj pãnhã amnhĩrer ã harênh

11Tã na pre Krisja tãm mẽ pahwÿr wrÿ nê kêp mẽ pahto Tirtûm wÿr xwÿnh maati nê patre hpãnhã mẽ pahto hwÿr o pa. Nom jar pika ja kamã mẽ kot mẽ ãhkra ho Tirtûm nhõrkwỹ kaàkre nhĩpêxta wÿr ãr nê kamã mẽ pahto hwÿr kaxyw na pre wrÿk kêt nê. Na pre ra akupÿm

kaxkwa hwÿr api nê kamã örkwÿ mex wÿr axà nê kamã tanhmã mẽ pahto mex to nê tanhmã mẽ pahto Tirtûm wÿr to rãhã ho hkrĩ. 12Ã kaxkwa kamã Tirtûm nhõ hitom maatija wÿr àr tipxi htã mẽ pahpiitã mẽ pahte amnhĩ tomnuj pãnhã amnhĩrer pa. Nom mẽmo mry kamrô ho mẽ pahpãnhã amnhĩrer kêt nê. Mõx kamrô rÿ motre kamrô ho mẽ pahpãnhã amnhĩrer kêt nê. Amnhĩ kamrô ho na pre mẽ pahpãnhã amnhĩre. Tyk nê hkamrô pikapĩrta o mẽ pahpiitã mẽ pahpãnhã amnhĩrer pa.

13Nê amnepêm Ijaew kot Tirtûm kapêr tûm kôt amnhĩ nhĩpêx mex o pa hkêt jakamã nhûm tee ri mẽ omu nê mẽ kot amnhĩ tomnuj o mẽ pa xwÿnh ã mẽ harê. Jakamã na pre mẽõ patre xatã mry kamrô ho mẽ hkamĩ. Mõx kamrô nê motre kamrô ho mẽ hkamĩ. Na pre mõi krare hkwÿ hpa nê ho hxêt nê hprã ho hkwÿjê kamĩ. ã na prem xatã mẽ hipêx anhÿr o pa. Tirtûm kot ja hã mẽ omunh nê mẽ mex ã mẽ harênh kaxyw. Nom te mẽ krãhkã pix mex pyrã nê mẽ hkrã kaxwÿnh kãm arĩ hamaxpêr punuj o pa. 14Ã na prem amnhĩ nhĩpêx anhÿr o pa. Nom Krisja mẽ kurom aa tanhmã amnhĩ tomnuj to hkêt jakamã na pre mẽ pahte amnhĩ tomnuj xwÿnhjê nê ty. Te mẽ kot amnhĩ nê mõi rÿ motre hpar nê hkamrô runhta pyrãk o amnhĩ nhĩpêx nê mẽ panê Tirtûm mã amnhĩ gõ nhûm pre mẽ kãm hkurê xwÿnhjaja kupĩ. Na pre Tirtûm Karõja ã kot mẽ panê htyk anhÿr kaxyw tanhmã ho hihtÿx to. Karõja aa hapêx kêt kumrêx rãhã nê pa ho pa xwÿnh jakamã na pre Kris tykja kukamã tanhmã ho hihtÿx to nhûm mẽ panê ty. Tapxipix na mẽ pahte tãm amnhĩ nhĩpêx o papa kaxyw kêp tanhmã mẽ pahkrã hto xwÿnh. Jakamã na pu htem ra pajamaxpêr nyw o pajamaxpêr o papa nê pajamaxpêr o:

—Na pa pre tee ri inhmã amnhĩ krã hkôt tãm amnhĩ nhĩpêx o ixpa hprãm kaprÿ nê ãm amnhĩ tomnuj pix o ri ixpa. Tã Kris kot inhnê htyk o hkamrô pikapĩr ã harênh ma nê amnhĩ kaxyw hkôt ijamaxpêr tÿx nê nhûm amnhĩ tã ixpumu nê ixte tãm amnhĩ nhĩpêx o ixpa kaxyw ixãm. Jakamã kot paj ãm Tirtûm pix mã kãm tanhmã amnhĩ nhĩpêx to ho ri ixpa. Tĩr rãhã nê pa ho pa xwÿnh jakamã kot paj nhÿrmã kuri urãk nê ixtĩr tûm nê ixpa ho ixpa. Anê.

15Nê amnepê mã na prem piitã Tirtûm kapêr tûm kôt amnhĩ nhĩpêx mex o pa hkêt nê. Mẽ kot xatã hkôt amnhĩ nhĩpêx o pa hã amnhĩ jarênh tã hkôt amnhĩ nhĩpêx kêt nê. Jakamã na pre Kris wrÿ nê mẽ pahte hkôt amnhĩ xunhwÿr mã xwÿnhjê mã Tirtûm kapêr nyw jarê nê mẽ pamã:

—Kot paj mẽ anê ty nhûm Tirtûm ã ixte amnhĩ nhĩpêx anhÿrja kukwak ri mẽ ato mex rãhã ho pa. Anê.

Hãmri nê amnhĩ jarênh xà hkôt mẽ pahte amnhĩ tomnuj piitã hpãnhã amnhĩrer kaxyw mẽ panê ty. 16-17Te jar pika ja kamã mẽhõ htyk kukamã hkrajê mã tanhmã amnhĩ jarênh to pyrãk. Na htem htyk kaxyw nê hkrajê mã:

—Nà kot paj mēmo arıgro hã ty ka mē inhmÿr pê ixpê ixkukrêx kwÿ o arık.

Anhÿr o na htem amnhĩ jarē. Hãmri nē ty nhũm hkrajaja amnhĩm õ mēmoj to àrık pa. Mē hipêêxà kukwak ri mē hikukrêx mex nē mÿr pê o pa. No kormã htır ri nhũm mē kormã kêp hamÿnh kêt nē. Ja pyrã nē na pre Tirtũmja Jejus htyk kukwak ri tanhmã mē pahto mex to pu mē kukwak ri mē pamex nē pahkĩnh nē ri papa.

18Nē Tirtũm kapêr tũm kôt na pre hte mē õ patre mry pa nē âm hkamrô runh kôt pix mã mē ho Tirtũm wÿr o pa nhũm amnhĩ tã mē omunh xà hkôt mē kuma nē tanhmã mē ho mex to.

19Na pre finat Mojesja Ijaew mã Tirtũm kapêr tũm piitã harē nē harēnh pa hãmri nē môx õxpĩ nē kaxyw motre hõxpĩ. Hãmri nē xijere kamã hamē wa hkamrô runh pa nē kamã gô hkwÿ ru. Hãmri nē kaxyw mēmo pĩ hpa hkryre pê “isop” jarēnhja kwÿ kukē. Nē kaxyw ôwēhti hkĩ kamrêkre hkwÿ hpy nē isop mē ho pihkàr pa nē mry kamrô o go. Hãmri nē ho hkwÿjê kamĩ. Nē ho Tirtũm kapêr ã kagã tũmta kamĩ. 20-22Hãmri nē ho anhÿr pa nē mē kãm:

—Nà na Tirtũmja ixte mry kamrô ho mē akamĩr pumunh kôt mē pamã kapêr o: “E kot kaj mē ixkapêr kôt amnhĩ nhípêx o ri apa hã kot paj tanhmã mē ato mex to rãhã ho ri ixpa ka mē amex nē akĩnh nē ajamakêtkati nē ri apa. Jakamã kêr ka mē mry kamrô ho mēmoj piitã hkamĩr pa. Nē ho amnhĩ kamĩ. Kêr pa ja hã mē apumu hãmri nē axte tanhmã mē ate amnhĩ tomnuj tota mã ijamaxpêr kêt nē.” Anē. ã na Tirtũm mē pamã kapêr anē. Anē.

Hãmri nē hpãnhã mry kamrôta o òrkwÿ kaàkre kamĩ. Nē hkre kamã mēmoj kuhê xwÿnh piitã nhũm ho hkamĩr pa. ã na pre mē õ patre mē mex kaxyw mē hipêx anhÿr o pa. Mē kot tõhã mēmoj to hpÿnhre nē ho hkamĩr kêt jakamã kironhÿx pre mēmoj piitã ã hipêx anhÿr o pa. Kop apu mē kot mry hpar nē hkamrô runh kêt ronhÿx pre Tirtũm arĩ mē kot amnhĩ tomnuj mã hamaxpêr rãhã ho pa.

23Na prem ã Tirtũm nhõrkwÿ kaàkre kamã mēmoj kuhê xwÿnh piitã mex kaxyw hipêx anē. Te Tirtũm kot mē pahto mex nhũm mē pahte nhÿrmã ma kaxkwa hwÿr õ krĩ hwÿr paxàpirta pyrã nē. Nom mē kot mry hpar nē hkamrô runhta kukwak ri mē pamex nē papa hkêt. Âm mēhõ kamrô kukwak ri mē pamex xwÿnhhta pix kukwak ri na mē pahpê pahfır tũm nē papa mã xwÿnh. Ja na mex o mry kamrô piitã hakrenh pa. 24Jejus Krisja pix kukwak ri. Tãm na pre patre pyrã nē mē pahto Tirtũm wÿr kaxyw mē ãhkra ho Tirtũm nhõrkwÿ kaàkre nhípêxta wÿr gjêx kêt nē. Âm ixkre kaàkre pix na pre. Na pre kaxkwa kamã Tirtũm nhõ krĩ hwÿr axã. Tã arĩ kamã Tirtũm nhĩhkô hã mē pahto hwÿr rãhã ho hkrĩ.

25Nē Ijaew nhõ patre maati na hte amgrã mē òrkwÿ kaàkre kamã hitom maati hwÿr gjêx tipxi. Nē amnhĩ kôt mry kamrô ru nē ho agjê.

Tĩrtũm kot hã omunh nẽ axte mẽ kot amnhĩ tomnuj mã hamaxpẽr hkêt kaxyw. Nom Kris na pre mẽ uràk nẽ mẽmo mry pa nẽ Tĩrtũm mã hkamrô kapĩr kêt nẽ. Kamrô na pre mẽ panê axkapĩ. Nom patre pyrà nẽ amgrà mẽ ã amnhĩ nhĩpêx anhỹr kêt nẽ. Na pre htyk o Tĩrtũm mã amnhĩ nhõr tipxi. **26**Kêp apu patre pyrà nẽ amgrà mẽ mẽ panê htyk o pa ronhỹx ra mẽ panê htyk xohtô rax kumrêx. Nhỹx pre amnepê mã Tĩrtũm kot mẽmoj piitã ho katorta rũm amgrà mẽ mẽ panê htyk o pa ho hkrax. Jao xatã htyk o amgrà xohtô rax kumrêx. Nom ja kot anhỹr kêt. Na pre mẽ pahwỹr wrỹ nẽ mẽ panê htyk tipxi htã htykja o mẽ pahte amnhĩ tomnuj piitã hpãnhã amnhĩrer par kumrêx. Jakamã mo kaxyw koja axte ty?

27Ãm pahtyk tipxi htã koja Tĩrtũm nhỹrmã akupỹm mẽ pahpiitã mẽ pahto pahtĩr nẽ ahpỹnhã tanhmã mẽ pajarênh to nẽ ahpỹnhã tanhmã mẽ panhĩpêx to. Kormã mẽ pahtĩr ri mẽ pahte amnhĩ nhĩpêx ã mẽ pahpumunh xà hkôt tanhmã mẽ panhĩpêx to. **28**Ja pyrà nẽ na pre Krisja ãm mẽ panê htyk tipxi htã mẽ pahto ohtô nẽ mẽ panê mẽ pahte amnhĩ tomnuj piitã rênh pa. Hãmri nhũm Tĩrtũm akupỹm ho htĩr nẽ akupỹm amnhĩ wỹr ho api. Tã koja nhỹrmã akupỹn mẽ pahwỹr wrỹ. Nom axte mẽ pahte amnhĩ tomnuj pãnhã amnhĩ rer kaxyw mẽ panê htyk kaxyw wrỹk kêt nẽ. Ra kot mẽ pahte amnhĩ tomnuj pãnhã amnhĩrer kênã. Kojã akupỹn wrỹ nẽ mẽ pahte amnhĩ wỹr kamã pajamak o papa xwỹnhjaja ma akupỹm amnhĩ kôt kaxkwa hwỹr mẽ pahto àpir pa. Ra mẽ pahtyk tã nhũm akupỹm mẽ pahto mẽ pahtĩr nẽ ma amnhĩ kôt mẽ pahto àpir pa pu mẽ kuri pamex nẽ pahtĩr tũm nẽ papa ho papa.



Kris kot mẽ panê htyk tipxi hã harênh

10 ¹Nẽ arĩ mẽ kot Tĩrtũm kapẽr tũm kôt amnhĩ nhĩpêx o mẽ pa xwỹnhjaja kormã hprĩ hã Tĩrtũm kot tanhmã mẽ pahto mex to hã harênh mar tỹx kêt. Na prem kormã hkwy PIX ma. Na hte mẽ õ patreja amgrà mẽ kãnhmã kaxkwa hwỹr mry kamrôta pẽ nẽ mẽ amnhĩ to Tĩrtũm wỹ. Kot ja hã mẽ omunh nẽ axte mẽ kot amnhĩ tomnuj mã hamaxpẽr hkêt kaxyw. Tã ã mẽ kot amnhĩ nhĩpêx anhỹr tã arĩ Tĩrtũm kapẽr kwỹm amnhĩ nhĩpêx rãhã ²jakamã na prem xatã kãm mẽmo mry kamrô runh o pa. Kêp apu tãm amnhĩ nhĩpêx nẽ tãm ri hamaxpẽr ronhỹx arĩ ã amnhĩ nhĩpêx anhỹr o pa hkêt nẽ. Nẽ xatã amnhĩ pãnhã mry hpar

nê hkamrô ho Tirtûm nhôrkwỹ kaàkre kamã mêmôj kamír kêt nê. 3Nom na prem tãm amnhĩ nhĩpêx o pa hkêt nê. Mê kot amgrã mê Tirtûm kot mê nê mê kot amnhĩ tomnuj rênh kaxyw mê kot kãm mêmô mry hpar o pa htã no ãm hkôt amnhĩ nhĩpêx xwýnh ã amnhĩ jarênh kêt nê. Arĩ mê kot amnhĩ tomnuj o pa jakamã na prem mry hparta ã amnhĩ pumu nê tee ri amnhĩ kukamã hamaxpêr o hkaprĩ nê pa. 4Nom na hte môx kamrô rý motre kamrôja mê panê mê pahte amnhĩ tomnuj rênh kêt nê. 5-8Jakamã na pre Krisja mê pahwýr nojarêr nê Tirtûm mã amnhĩ jarênh o:

Pa Tirtûm? E kot paj ma mê hwýr wrý.

Mê kot amnhĩ pãnhã amã mry hparta apê hprãm nõkati nê amã hkĩnh kêt.

Ate mê nê mê kot amnhĩ tomnuj rênh kaxyw mê kot amã mêmô mry hparta amã hprãm kêt. ãm ixkukamã na ka pre ã mê kot amnhĩ nhĩpêx anhýr kaxyw mê kãm ja hã karô.

Mê kot mry nhĩpêx o te pa ixte mê nê ixtyk nê ixkamrô pikapír pyrãk o na prem ixkukamã ã amnhĩ nhĩpêx anê.


Jakamã na ka ra mê kaxyw inhmã inhĩ gô pa mê urãk nê inhĩ ho inhĩ.

Tã kot paj ma mê hwýr wrý. Ixte amã hprãm xà hkôt pix mã ixte tanhmã amã amnhĩ nhĩpêx to ho ixpa kaxyw. Akapêr ã kagã htûm kot tanhmã ixkukamã ijarênh to xà hkôt kot wrý nê ã amã amnhĩ nhĩpêx anê. Anê.

Hãmri nê man mê pahwýr wrý. 9Kot Tirtûm kapêr tûm o hapêx par nê hpãnhã tãm mê panê htyk kaxyw wrý. Jakamã na pre nojarêr nê Tirtûm mã amnhĩ jarênh o:

—E ixte amã hprãm xà hkôt amnhĩ nhĩpêx kaxyw kot paj ma mê hwýr wrý.

10Anhýr jakamã wrý nê Tirtûm kãm hprãm xà hkôt mê panê ty. Na pre nhãm mêhõ mê kãm hkurê xwýnhjê mã ôr nhûm mê kot hpír nhûm amarí htyk kêt nê. Na pre amnhĩ grônh kôt mê kãm amnhĩ gô nhûm prem kupĩ. Hãmri nhûm



Eprêw 10.1-4



Eprêw 10.5-10

htyk o mẽ pahte hkôt amnhĩ xunhwÿr xwÿnhjê o Tirtũm kra. Mẽ kot xatã mry hparta rom htyk tipxi tã mẽ pahpiitã mẽ pahte amnhĩ tomnuj pãnhã amnhĩrer pa.

11 Nẽ mẽ õ patrejaja na htem apkati mẽ Tirtũm nhõrkwÿ kaàkre kamã kãm tanhmã amnhĩ nhĩpêx to. Nẽ apkati mẽ hkwyjê hpãnhã mry hkwy hpa nẽ hkamrô ru nẽ mẽ ho Tirtũm wÿ. Tã nom ja hã mẽ omunh xà hkôt mẽ nẽ mẽ kot amnhĩ tomnuj rênh kêt nẽ. 12 No kêt Kris na pre mẽ kot xatã mry hpar xwÿnhta rom âm htyk tipxi htã mẽ pahte amnhĩ tomnuj piitã hpãnhã amnhĩre. Hãmri nẽ ma akupÿm kaxkwa hwÿr api nẽ Tirtũm nhĩhkô hã Pahi Maati hkrĩ xà kamã upôk rũm hkrĩ ho hkrĩ. 13 Kojã kuri hkrĩ rãhã nhũm Tirtũmja ãhkram mẽ kot kutã amnhĩ xunhwÿr xwÿnhjê jaxàr pa. Ja kaxyw na kormã kuri hamãr o hkrĩ. 14 Âm htyk tipxi htã htykja o mẽ pahte hkôt amnhĩ xunhwÿr xwÿnhjê ho Tirtũm kra pu mẽ ra hpãnhã tãm amnhĩ nhĩpêx rãhã ho papa. Nẽ pajamaxpêr mex o ri papa. Tirtũm kãm hprãm xà hkôt.

15 Amnepêm mẽ kot Tirtũm nhÿ hã kapêr jarênh o mẽ pa xwÿnhjaja na prem mẽ panhĩgêjtê mã kapêr o pa. Tirtũm Karõ nhÿ hã mẽ kãm kapêr nẽ mẽ kãm:

16—E na Tirtũm mẽ pamã amnhĩ jarê nẽ amnhĩ jarênh o:

Kot paj nhÿrmã axtem ixkapêr nyw o mẽ amã ixkapêr.

Nẽ mẽ akrãm hagjê ka mẽ mar tÿx pê hã ano htÿx nẽ ho apa.

Ixkapêr tũm na pa pre mẽ amã kên pota ã hã kagã.

Nom ixkapêr nyw kot paj axtem mẽ akrãm hagjê.

17 Nẽ kot paj axte mẽ ate amnhĩ tomnuj mã ijamaxpêr kêt nẽ.

Anhÿr o mẽ pamã amnhĩ jarênh. Anê.

18 Tã ra axte mẽ pahte amnhĩ tomnuj mã hamaxpêr kêt ã kot amnhĩ jarênh jakamã mo kaxyw kot pu mẽ arĩ amnhĩ pãnhã kãm mẽmo mry hpar nẽ hkamrô runh o papa? Tã mẽ pahkwÿjjaja na hte arĩ kãm ja ho anhÿr prãm o pa. E kwa mẽ axte ã amnhĩ nhĩpêx anhÿr kêt nẽ ixkwÿjjaja.

Akupÿm mẽ pahte amnhĩ nhĩpêx tũm o paxujanãr kêt ã mẽ pamã karõ

Matêwre 27.51; Rukre 23.45; Rõmãn 5.1-2; Epes 3.12; Eprêw 4.14-16

19-20 E ixkrãmnhwÿjjaja. Ra Jejus kot mẽ panê htyk o hkamrô pikapĩr jakamã na pu htem arĩ tee ri amnhĩ kukamã pajamaxpêr hkêt nẽ. Tirtũm axte kot mẽ pahte amnhĩ tomnuj mã hamaxpêr kêt jakamã na pu htem paxãmnhĩx amnhĩ to hwÿr o papa. Te paxãmnhĩx õrkwÿ kaàkre kamã hitom maati hwÿr pagjêx nẽ kamã amnhĩ to hwÿrta pyrãk. Jao ra mẽ papamjaja amnhĩ to hwÿr o papa nhũm patre axte mẽ pahto hwÿr kêt nẽ. Jejus na pre htyk o mẽ pamã hitom maati wÿr hakwakre kahêxã hã kupêxêja kôt ã ho axkjê. Jao mẽ paxãmnhĩx hwÿr mẽ pagjêx kaxyw mẽ pamã kahê xà mẽ. 21 Tã ra kêp Tirtũm nhõ krĩ kamã mẽ pahto hwÿr xwÿnh maati na. Nẽ mex kumrêx o jar pika ja kamã patre kot mẽ ho

hwÿr o pa xwÿnhhta jakrenh. **22**Jakamã e kwa kêr pu mẽ mãmri paxàmnhix amnhĩ to Tĩrtũm wÿr o papa. Ra Jejus kot mẽ panê htyk nhũm mẽ pahte amnhĩ kaxyw hkôt pajam taxpêr rãhã ho papa jakamã kêr pu mẽ axte mẽ pahpê amnhĩ tomnuj xwÿnh ã amnhĩ jarênh kêt nê. Kêr pu mẽ nhÿrmã tanhmã pajam taxpêr punuj to rÿ tanhmã amnhĩ tomnuj to hãmri nê tee ri ja hã amnhĩ pumu nê pahkaprĩ kamã amnhĩ to Tĩrtũm wÿr kurê kumrêx. Jejus ra kot mẽ pahte amnhĩ tomnuj pãnhã amnhĩrer par jakamã kot puj mẽ Tĩrtũm mã tanhmã mẽ pahte amnhĩ tomnuj to hã amnhĩ jarê nhũm mẽ pama nê axte kãm ham taxpêr kêt nê. Pu mẽ te paxwÿr nê pahte amnhĩ nê pagrã htyk kuhõnh par nê akupÿm pamex pyrãk. Nê axte paxàmnhix amnhĩ to Tĩrtũm wÿr o papa.

23Nê mẽ kot Kris ã tanhmã mẽ pahto htã kwa kêr pu mẽ tee ri amnhĩ kukamã pajam taxpêr kêt nê. Rÿ pajam taxpêr o:

—Konên. Koja mẽ tanhmã ham taxpêr to nê Kris ã ixpĩ rÿ ko. Pa apu mẽ kot ixpĩr pymaj akupÿm ixte amnhĩ nhĩpêx tũm o awjanã nê akupÿm hkôt amnhĩ nhĩpêx japêr rÿ ko. Anê.

Kwa pu mẽ tee ri ã pajam taxpêr anhÿr hkêt nê. Pu kêt mẽ pajam taxpêr o:

—Nã mẽ kot Kris ã tanhmã ixto htã kot paj aa hkaga hkêt nê. Mẽ kot hã ixpĩr mã tã kot paj hkaga hkêt kumrêx.

Anhÿr ã amnhĩ jarê. **24**Nê kêr ka mẽ akwÿjê mã anê kê mẽ mẽmoj to axpên kutã nojarêr rãhã ho ri axpên kôt pa. Jao tanhmã axpên to mex to o ri axpên kôt pa.

25Na pre ra mẽ pahkwÿjaja tanhmã ham taxpêr to nê axte mẽ pahkôt pikuprõnh nê Tĩrtũm kapêr mar o hkrĩ hkêt nê. No kêr pu mẽ ho mẽ urãk kêt nê. Kêr pu mẽ arĩ xatã axpên wÿr akuprõ nê mẽ pahte tee ri amnhĩ kukamã pajam taxpêr nê axpên mã pakapêr o papa. Kêt mẽ panhõ Pahihtija ra akupÿn mẽ pahwÿr wrÿk kaxyw jakamã kwa kêr pu mẽ kutêp arĩ axpên mã pajam taxpêr mex nhõr pê tãm axpên nhĩpêx mex rãhã ho ri papa.

26Mẽ pahkwÿjaja kot Tĩrtũm kapêr mar mex tã na htem kuma nê ãm kuma. Kwa kêr ka mẽ ho mẽ urãk kêt nê. Kris kot mẽ panê htyk ã harênhja mẽ kot mar mex tã na htem kuma nê ãm kuma nê hkaga kumrêx. Jakamã mēhõ koja Kris pyrã nê htyk o mẽ kot amnhĩ tomnuj pãnhã amnhĩre? Nã amrakati kumrêx. ãm Jejus pix na pre Tĩrtũm ja kaxyw ãm. Tapxipix na pre ã mẽ panê amnhĩ nhĩpêx anê. Tã nhũm mẽ kot hkagaja mÿrapê koja mẽ nhÿrmã mẽ tãmjaja mẽ kot amnhĩ tomnuj pãnhã amnhĩre. **27**Mẽ kot Tĩrtũm kutã amnhĩ xunhwÿr xwÿnh na mẽ. Amnepêm na pre Tĩrtũm mẽ kot kutã amnhĩ xunhwÿr xwÿnhjê kaxyw mẽ kot amnhĩ xà htÿx kamã hamak tũm xàta nhĩpêx. Tã ra mẽ kot Jejus kaga jakamã koja nhÿrmã ma hwÿr mẽ rênh pa nhũm mẽ tee ri kãm hwÿr pa hprãm kêt kaprÿ. **28**Amnepêm finat Mojesja kormã

htîr ri na pre hte mēhō pixi nē kapēr kaga nē akupÿm kot amnhî nhîpêx tûm o awjanā nē tanhmā amnhî tomnuj to nhûm hkwyjaja ja hã omu. Tanhmān axkrut rÿ axkrunēpxi nē ja hã omu. Hāmri nē ma Mojes wÿr mra nē axpēn kôt kām tanhmā kot amnhî tomnuj to hã harē. Hāmri nhûm harēnh ma nē mē kām hã amÿnē nhûm tee ri kām htîr prām kaprÿ. Mē kot akupÿm amnhî nhîpêx tûm o ujanār nē amnhî tomnuj o paja mÿrapê na prem mē kupa. Ā na pre htem mē hipêx anhÿr o pa.

29Nē koja mēhō tanhmā Tîrtûm Kra Jejus o kapēr punuj to. Tîrtûm kapēr ā kagā htûm kot ra mē kot kêp Tîrtûm Kra hã harēnh mar mex tā axtem nē tanhmā ho kapēr punuj to ho pa. Kot mē panê htyk nē hkamrô pikapîr kôt kot mē pahte amnhî tomnuj pānhā amnhîrer ā harēnh mar tā kuma nē ām kuma nē harēnh o:

—Nā mē pahpyrā nē kot amnhî tomnuj xwÿnh nhûm mē kot hã hpîr kēnā. Na pre mē panê htyk kêt nē.

Anhÿr ā harē. Nē Tîrtûm Karōja nhûm määnēn tanhmā ho kapēr punuj to. Kêp mē pakutā nojarêt xwÿnh tā nhûm axtem nē tanhmā ho kapēr punuj to. Mÿrapê koja nhÿrmā Tîrtûm tanhmā homnuj tÿx to. Homnuj tÿx o mē kot Mojes kapēr kaga nhûm mÿrapê kot mē hparta jakre. Jakamā kwa kêr ka mē ā amnhî nhîpêx anhÿr hkêt nē. 30Tîrtûm kapēr ā kagā htûm kot ja jarēnh kot:

Ixpê Tîrtûm kot paj mē kot amnhî tomnuj xwÿnhjê homnuj tÿx nē. Anē.

Nē mē kot tām amnhî nhîpêx xwÿnhjê jarēnh kot:

Mē kot amnhî to mex o mē pa xwÿnhjaja kot paj nhÿrmā mē ho mex rax nē. No mē kot amnhî tomnuj o mē pa xwÿnhjaja kot paj nhÿrmā mē homnuj tÿx nē. Anē.

Ra mē pahte ā kapēr anhÿr xwÿnhja kot amnhî nhîpêx ā omunh mex. 31Jakamā kwa mē okora. Kêr ka mē amnhî to mex rāhā ho ri apa. Tîrtûm rāhā ho rāhā nē hihtÿx o hihtÿx jakamā koja mēmoj tā akamā gryk ka amex kêt o amex kêt.

32Nē amnepēm mē ate Jejus kôt amnhî xunhwÿr krax kām na prem Jejus ā mē atomnuj tÿx tā ka prem mē umaj hkaga hkêt nē. Tā kêr ka mē arî ā amnhî nhîpêx anhÿrja kukamā mǎn ajamaxpēr nē hã anohtÿx rāhā ho apa. Jao arî ā amnhî nhîpêx anē nē mē umaj Jejus kaga hkêt nē. 33Na prem mē piitā mē noo mā tanhmā mē amā kapēr punuj to nē tanhmā mē anhîpêx to. Nē tōhā tanhmā mē akwÿjê homnuj tÿx to ka mē tee ri ja hã mē omu nē mē kamā axukaprî nē. Nē mē hkôt axkamē nhûm prem mā mē ato anē nē. 34Na prem mē akwÿjê jagjê ka prem ja hã mē omu nē ma mē hagjēnh xà hã ixkre hwÿr mē hwÿr mra nē tanhmā mē ho mex to. Nhûm prem mē apê mē akukrêx kwÿptā nē ma amnhîm o pa ka mē ām amnhî tā mē omu nē ajamaxpēr o:

—Kwâr mē māmri ma amnhīm hamÿn o pa. Koja nhÿrmã Tirtūm inhmã ixkukrêx mex o kot ja jakrenhta kwÿ nhôr rax nê pa amnhīm hamÿ nhūm aa ixpê hapêx kêt nê. Hāmri nhūm axte mēhō aa ixpê utâr kêt nê. Jar mē ixkukrêxta mexti hã. Anê.

Jao mē kot mē apê utâr tã ka mē akaprī nã apa hkêt nê. ã amnhī kukamã ajamaxpêr anhÿr pê akīnh nê apa. ãm hāmri na ka prem ã amnhī kukamã ajamaxpêr anê. ³⁵Na ka prem mē kutã amnhī to htÿx kãm ã apa anê. Tã kwa kêr ka mē arī ã amnhī nhīpêx anhÿr o ri apa. Kêr kê nhÿrmã Tirtūm ja hã mē ato mex rax nê.

³⁶Nê kêr ka mē arī amnhī kaxyw Tirtūm mã ajamaxpêr rãhã ho ri apa. Mē kot Jejus ã tanhmã mē ato htã ka mē hkaga hkêt nê. Kot kaj mē ã amnhī nhīpêx anhÿr o apa nhūm Tirtūm ja hã mē apumu nhūm ja kãm mex nê. Hāmri nhūm ra kot amnhī jarênh xà hkôt nhÿrmã amã mēmoj mex nhôr rax nê. Jakamã kwa mē kot tanhmã mē anhīpêx to hã amnhī pumu nê tee ri amnhī kukamã ajamaxpêr o ri akaprī hkêt nê. Kot kaj mē Kris ã apunuj rãhã apa hkêt nê. ³⁷Tirtūm kapêr ã kagã htūm kot Jejus jarênh kot:

Koja mē pahwÿr wrÿk mã xwÿnhhta tokyx wrÿ. Na ra wrÿk kaxyw nojarêt. Anê.

³⁸Nê harênh kot:

Ixxôt mē kot amnhī nhīpêx mex o mē pa xwÿnhjaja koja mē amnhī kaxyw ixkôt hamaxpêr tÿx rãhã nê. Jao nhÿrmã ixri htír tūm nê mex rãhã nê pa ho pa.

Nê koja mēhō ixkaga pa tee ri kãm ixkīnh kêt ã omu. Anê.

³⁹No mē papajaja te mē pahte mē kot Jejus kaga nhūm kot amnhī tã mē homnuj mã xwÿnhjê pyrãk kêt. Arī mē pahte amnhī kaxyw hkôt pajamaxpêr rãhã jakamã koja nhÿrmã amnhī wÿr mē pahto api.

Amnhī kaxyw Tirtūm kôt mē hamaxpêr mex xwÿnhjê jarênh

Sikūn Pêtre 3.5-7

11 ¹Nê na htem Kris ã mē panhīpêx kati ho pa pu mē pahpunuj rãhã nê ri papa. Te Kris kot mē pahto mex kêt pyrãk pu htem mēmoj punuj pix kãm ri papa nê kormã Tirtūm kot mē pahto mex ã amnhī tã omunh kêt nê. Tã ã mē pahte anhÿr tã kwa kêr pu mē arī kapêr kôt amnhī nhīpêx rãhã ho papa. Mē pahte pano ho Tirtūm pumunh kêt tã kot mē pahkôt pa ho pa hã amnhī kaxyw kãm pajamaxpêr tÿx rãhã ho papa. Jakamã na pu htem ãm kapêr kôt pix mã amnhī nhīpêx o papa.

²Amnepê mã mē pakukamã mē panhīgêjtjaja na prem no ho Tirtūm pumunh kêt tã amnhī kaxyw kãm hamaxpêr nê kapêr kôt amnhī nhīpêx o pa nhūm amnhī tã mē omu nhūm ja kãm mex nê.

³Nê mē papajaja na pu htem pajaxwÿja mē pano ho omunh kêt tã amnhīm harênh o:

—Nà amnepê m kormã mêmoj piitã amrakati ri nhũm Tirtũm ãm kapêr pix o mêmoj piitã ho kato. Ixte inhno ho ja hã omunh kêt tã kot ã amnhĩ nhĩpêx anhỹr ã amnhĩ jarênhja jakamã kot paj hkôt ijamaxpêr tỳx rãhã ho ri ixpa. Anê.

4Na pre finat Atãw nhĩpêx nê kaxyw hprõ Ewa nhĩpêx. Hãmri nhũm wa hkra Apewja htõ Kaĩ rom amnhĩ kaxyw Tirtũm kôt hamaxpêr tỳx o pa. Jakamã nhũm wa Tirtũm mã mêmoj gõ. Nhũm Apew kot Kaĩ rom Tirtũm kãm hprãm xà hkôt kãm mêmoj nhõr jakamã nhũm amnhĩ tã omu nê kot amnhĩ to mex xwỳnh ã harê nê kot kãm õr xwỳnhhta nhũm mex ã harê. Tã Apew amnepê m htyk tã pu htem arĩ harênh mar rãhã ho papa nê kãm pajamaxpêr o:

—Apew na pre hte amnhĩ kaxyw Tirtũm kôt hamaxpêr tỳx rãhã ho pa.

Anhỹr ã kãm pajamaxpêr.

5Nê Atãw kanrêhã htãmnhwỳ Enokja na pre haxwỳja amnhĩ kaxyw Tirtũm mã hamaxpêr tỳx o pa. Jao hkamnàr rom kãm hprãm xà hkôt pix mã tanhmã kãm amnhĩ nhĩpêx to ho pa nhũm amnhĩ tã omu nê amnhĩm mex ã harê. Jakamã na pre htyk kêt nê. Na pre Tirtũm htĩr rãhã ma amnhĩ wỳr ho api nhũm hkwỳjaja tee ri hapêr o pa. Jakamã na pu htem arĩ axpên mã Enok kot amnhĩ kaxyw Tirtũm kôt hamaxpêr mex o pa hã harênh o papa. 6Mê kot amnhĩ kaxyw Tirtũm mã mẽ hamaxpêr kêt xwỳnhjaja na hte Tirtũm mẽ mex ã mẽ harênh kêt nê. Tã mẽ papajaja kêr pu mẽ Enok pyrã nê amnhĩ kaxyw kãm pajamaxpêr tỳx rãhã ho papa. Nê pajamaxpêr o:

—Tirtũmja htĩr rãhã ho rãhã. Koja nhỹrmã mẽ ixte amnhĩ kaxyw hkôt ijamaxpêr xwỳnhjê ho mex rax nê. Nà koja mẽ ixto anê.

Anhỹr o mẽ pajamaxpêr nhũm Tirtũm amnhĩ tã mẽ pajamaxpêr ã mẽ pahpumu nê mẽ pahte amnhĩ to mex ã mẽ pajarê. No mẽ kot amnhĩ kaxyw kãm hamaxpêr kêt xwỳnhjaja na hte ã mẽ harênh anhỹr kêt nê.

7Nê Enok kanrêhã htãmnhwỳ Noehtija na pre haxwỳja amnhĩ kaxyw Tirtũm mã hamaxpêr tỳx o pa. Jao hkamnàr rom amnhĩm pàr raxja nhĩpêx. Na pre ra Tirtũm na rax kukamã tanhmã kãm ujarênh to. Kormã aa na wrỳk nhũm Noehiti kot omunh kêt tã Tirtũm kapêr ma nê mar xà hkôt amnhĩm pàr rax kumrêxta nhĩpêx. Òrkwỳ kamã hkwỳjê mẽ mẽ amnhĩm hipêx. No mẽ kot Tirtũm kapêr mar nê ãm mar xwỳnhjaja na pre Tirtũm gõ tãm o mẽ hanhi nê mẽ himex pa. Nom Noehtija nhũm kot amnhĩ to mex xwỳnh ã harê. Kot amnhĩ kaxyw hkôt hamaxpêr rãhã ho pa jakamã nhũm pre ã mex ã harênh anê.

8Nê Noehiti kanrêhã htãmnhwỳ Apraãwja na pre haxwỳja amnhĩ kaxyw Tirtũm mã hamaxpêr tỳx o pa. Na pre Tirtũm kot kãm pika nhõr ã kãm amnhĩ jarê nê ra kot ma hwỳr mênh kaxyw. Hãmri nhũm Apraãw kuma nê hkamnàr rom õ pika kaga nê ma pika hõja wỳr pa. Aa kot ma

hwÿr mōr nē omunh kêt tā Tīrtūm kapēr mar xà hkôt ô pika kaga nē ma hwÿr pa ho pa. ⁹Hāmri nē hwÿr pōj nē omu nhūm Tīrtūm kām:

— E pika ja kot paj nhÿrmã akanrêhã akra nē atàmnhwÿjê mã kugō. Anē.

Hāmri nhūm kuma nē pikaja kamã pa ho pa. Ra kamã axtem mẽ uro hkwyjaja ri pa nhūm Tīrtūm kormã mẽ kator kêt ri nhūm mẽ ô pika hwÿr pōj nē mẽ kamã pa ho pa. Nom amnhīm ōrkwÿ mex nhîpêx kêt nē. Kormã kêp ô pika kumrêx kêt ã hkamnhix jakamã âm mry kà o ixkre nhîpêx nē kamã pa ho pa. Nē nhÿhÿm pa kaxyw nē kugrà nē ma amnhî kôt o pa. Amnhî kaxyw Tīrtūm mã hamaxpēr rãhã jakamã ã amnhî nhîpêx anhÿr o pa.

Nē Apraãw kra Ijak nē htàmnhwÿ Jakoja wa Apraãw pyrà nē mry kà ho ōrkwÿ nē ma amnhî kôt o pa. Nhūm Tīrtūm kot Apraãw mã kapēr pyrà nē wa kãm wa hkanrêhã wa hkra nē wa htàmnhwÿjê mã pika nhōr ã amnhî kukamã wa kãm amnhî jarê. ¹⁰Jakamã nhūm Apraãw kormã Tīrtūm nhō krî hwÿr àpir xa hã amnhî tā hamār pê kot ho ô pika mã xwÿnhjê kamã pa ho pa. Kaxkwa hwÿr àpir mã xwÿnhta mex kumrêx. Tīrtūm kot hipêx jakamã koja mry kà ho ixkre nhîpêxta rom aa hapêx kêt nē. Jakamã nhūm Apraãw mẽ pahpyrà nē ma kot hwÿr àpir xa hã amnhî tā Tīrtūm jamār rãhã ho pa. ¹¹⁻¹²Tã ra hpigêt tÿx nē hkurê hkêt nē pa. Te ra ri htyk kaxyw pa pyràk. Nhūm hprō Sara haxwÿja hpigêx tÿx nē. Kamrô hkêt ã amgrà xohtô rax kumrêx. Nhūm wa aa hkra hkêt nē pa htã nhūm Tīrtūm nhÿrmã wa hkra hã wa kãm awjarê nhūm wa kuma nē amnhî kaxyw hkôt hamaxpēr kurê kumrêx. Nom amnhî tā kuma nē tee ri amnhî kukamã hamaxpēr hkêt nē. Na pre wa kuma nē xpen mã:

— Nà kot puj xep hāmri tā pahkra. Tīrtūm kot hã ã pajarênh anhÿr kênã. Anē.

Tã ã wa kot hkra kaxyw Tīrtūm mã hamaxpēr anhÿr jakamã na pre Apraãwja hprō htu. Ra wa hamê hpigêt tÿx kumrêx tā nhūm htu. Nhūm wa hkra Ijakja gaa nē wa kãm kato. Jakamã nhūm wa gaa nē rî wa hkanrêhã wa htàmnhwÿ xohtô rax o ohtô rax. Ohtô ho kaxkwa kamã kanhêti xohtô jakre. Nē ohtô ho gô xujanār mÿri pikahti grã hkryre jakre. Jakamã nhūm mẽ tee ri mẽ ho kôta hpar mã. Nhūm Apraãw kêp mẽ hpàr krax. ¹³Tã nhūm Apraãw nē Ijak nē Jakoja mẽ ri pa tãmtã nē htyk pa nē hapêx. Tīrtūm kormã kot mẽ kãm pika jarênhta nhōr xwÿj ri ra htyk pa. Nom kormã mẽ htír ri tanhmã kãm hamaxpēr to nē hamaxpēr o:

— Nà kormã Tīrtūm kot mẽ inhmã pika jarênhja nhōr kêt tā koja nhÿrmã inhmÿr pê ixkanrêhã ixkra nē ixtàmnhwÿjê mã kugō. Nà koja mẽ kãm kugō. Ra kot hã inhmã amnhî jarênh kênã kot kêt mẽ kãm ōr kêt.

Anhÿr o kaxyw kãm hamaxpêr rãhã ho pa. Jao hkĩnh nê hamaxpêr o:

—Nà inhõ krĩa axtem na. Na pa hte jar pika ja kamã ri mẽ hkõt krĩ ixpa. Te ixpê mẽ uro pyrã nê ri mẽ hkõt ixpa nom jar inhõ krĩ hkêt. Inhõ krĩ na kêt axte mã. Anê.

14-15Na prem ã õ krĩ hõ hkukamã hamaxpêr anhÿr o pa. No õ krĩ htũmta mẽ kot hkaga nê pika hõ hwÿr mõi xwÿnhnta na prem ã harênh anhÿr kêt nê. Kop apu mẽ kot amnhĩm tãm mãn jarênh ronhÿx prem awjanã nê ma akupÿm hwÿr pa. Na prem axtem krĩ hõ jarê nê kormã hwÿr mõi kêt ã amnhĩ jarênh o pa. 16Tã nhÿ krĩ na prem ã harênh anê? Nà kaxkwa kamã Tĩrtũm nhõ krĩa. Tãm na mex kumrêx jakamã nhũm prem kormã hwÿr ma àpir xa hã mẽ pahpyrã nê amnhĩ tã Tĩrtũm jamãr rãhã ho pa nhũm amnhĩ tã mẽ omu nê hkĩnh nê. Nê mẽ kot tãm amnhĩ nhĩpêx ã mẽ omu nê mẽ kêp hkra hã mẽ harênh ã hpijaãm kêt nê. Hãmri nê mẽ kutêp tanhmã õ krĩ ho mex to ho pa.

17-18Na pre ra tanhmã Apraãw mã hkra Ijakja jarênh to nê kãm:

—Akra Ijak kanrêhã hkra nê htãmnhwÿjaja koja mẽ kêp ixkra. Anê.

Tã ra kot amnhĩ tã Apraãw kamã hamak kaxyw hkukamã hamaxpêr nê hamaxpêr o:

—Xà we Apraãw kãm ixkĩnh tÿx kumrêx nê kãm ixkõt amnhĩ nhĩpêx rãhã ho pa hprãm nà? Xà we kãm ixkĩnh tÿx o hkrata jakrenh? E pa kop we ja hã amnhĩ tã kamã ama nê omu mãn. Anê.

Hãmri nê kot hkra hpĩr nê kãm õr ã kãm karõ. Hãmri nhũm kuma nê ra kot kãm hpĩr kaxyw. Kot Tĩrtũm kot amnhĩ nhĩpêx ã omunh mex jakamã hkamnãr rom kot kãm hpĩr kaxyw. 19Nê hamaxpêr o:

—Nà Tĩrtũm akupÿm kot mẽ ho htĩr xwÿnh kênã.

Anhÿr jakamã kãm hkra hpĩr puma hkêt nê ra kot kãm hpĩr mã tã nhũm Tĩrtũm amnhĩ tã omu nê nê kãm kapêr nhũm kuma nê hpĩr kêt nê wa ma akupÿm õrkwÿ hwÿr mõi. Tã ã kot hkra nhĩpêx anhÿr jakamã Apraãw mã te Ijak htyk nê akupÿm htĩr pyrãk.

20Nê Ijakja na pre haxwÿja amnhĩ kaxyw Tĩrtũm mã hamaxpêr tÿx o pa. Jao hkamnãr rom amnhĩ kra wa kãm Tĩrtũm kot wa ho mex kukamã wa kãm harê. Kra Jako mẽ Ejauta wa kãm harê nê wa kãm:

—E koja nhÿrmã Tĩrtũm inhmÿr pê war ato mex rãhã ho pa. Anê.

21Nê Jakoja na pre haxwÿja amnhĩ kaxyw Tĩrtũm mã hamaxpêr tÿx o pa. Jao hkamnãr rom hkra Juje mã Tĩrtũm kot mẽ ho mex kukamã harê. Na pre Jakoja hkra nê htãmnhwÿ mẽ hpimràãtã hprãm xaj ma Ejit wÿr pa nê kamã pa ho pa. Tã nhũm Jako hpigêt tÿx nê ra htyk kaxyw. Hãmri nê hkra Juje mẽ hkra wa mẽ kãm kapêr nê mẽ kãm:

—E na pa tee amnhĩ kamã ama. Na pa ra ixyk kaxyw. Nom koja Tĩrtũm nhÿrmã inhmÿr pê mẽ ato mex rax nê. Anê.

Hãmri nê amnhĩ kaxpar xã hã pĩ hã amnhĩ kaxpa nê kãnhmã xa nê Tĩrtũm mã mex o mex ã harê. Hãmri nê akupÿm nõr xã kamã nõn ty.

22Nê Jujeja na pre haxwÿja amnhĩ kaxyw Tĩrtũm mã hamaxpêr tÿx o pa. Jao htyk kaxyw nê hkamnàr rom hkwyjê mã tanhmã amnhĩ jarênh to. Ra hpigêt nê htyk kaxyw nê hkwyjê mã tanhmã amnhĩ tâ karô hto nê mẽ kãm:

— E na pa ra ixyk kaxyw. Tã koja Tĩrtũm inhmÿr pê nhÿrmã Ejit rũm mẽ akator nê ma akupÿm mẽ panhõ pika hwÿr mẽ ato pa. Ra kot mẽ panhĩgêt Apraãw mã amnhĩ jarênh xà hkôt. Jakamã kwa mẽ inhma. Kêr ka mẽ akupÿm anojarêt nê ma amnhĩ kôt ixtã kasãwja mÿ nê amnhĩ kôt ixto mõi. Hãmri nê mũtar mẽ panhõ pika kamã mẽ anhõ krĩ htã ijaxà pa jawÿ mẽ akuri ixtã pyka. Anê.

23Nê Mojes katorxà mẽ hipêêxàja na pre wa haxwÿja jajê pyrã nê amnhĩ kaxyw Tĩrtũm mã hamaxpêr tÿx o pa. Juje hkanrêhã htãmnhwÿ na pre wa. Jakamã nhũm Ejit nhõ pahija tee ri Ijaew xohtô rax kumrêx ã mẽ omu nhũm ja kêp omnuj nê. Hãmri nhũm mẽ hkra myjaja mẽ hapôx kôt mẽ hamÿnh xwÿnhjaja kot mẽ hpar ã mẽ kãm karô. Tã nhũm Mojes kato nhũm hipêêxà mẽ katorxàja wa omu nhũm muxre nhũm wa tee ri hkukamã hamaxpêr. Hãmri nê pahi Paraohti mã mẽ hkra jamÿnh xwÿnh kot wa kêp hpĩr pymaj ho pimxur o hã mytwrÿ axkrunêpxi. Tĩrtũm kamnàr rom wa amnhĩ tâ kãm uma hkêt nê ã kêp hkra ho hpimxur anê.

24Nê Mojes na pre haxwÿja amnhĩ kaxyw Tĩrtũm mã hamaxpêr tÿx o pa. Kormã karàre ri na pre Paraohti hkra nija omu nê amnhĩm kumÿ nê ho hkra nê amnhĩ kôt o pa. Rãhã nhũm àptàr nhũm Ejit nhõ xwÿnhjaja kêp pahi Paraohti htãmnhwÿ hã axpên mã harê. Hãmri nhũm tee ri amnhĩ tâ mẽ kuma nê amnhĩ tâ mẽ kãm aprã nê mẽ kãm:

— Kwa mẽ ã ijarênh anhÿr kêt nê. Ixpê mẽ akwÿ hkêt. Anê.

25Àm kãm Tĩrtũm kwÿjê kôt pix mã ri pa ho pa hprãm. Nê kãm Ejit nhõ pahi hkôt amnhĩ tomnuj prãm kêt nê. Àm mẽ kot amnhĩ tomnuj pix o paja na mẽ kãm hprãm nhũm ja hã mẽ omu nê tee ri mẽ hkukamã hamaxpêr nê hamaxpêr o:

— Nà kot paj mẽ hkôt ri ixpa hkêt kumrêx. Mẽ hkĩnh nê pa htã koja mẽ gaa nê ty nhũm mẽ hkĩnhja mẽ kêp hapêx. Nà kot paj Tĩrtũm kwÿjê hkôt mãn ri ixpa ho ixpa. Mẽ kot Tĩrtũm ã mẽ inhĩpêx kati htã pa arĩ mẽ hkôt ixpa ho ixpa. 26Inhmã Ejit nhõ xwÿnhjê hkôt ixkukrêx rax nê ri ixpa hprãm kêt. Kwãr mẽ mãmri Tĩrtũm ã tanhmã inhĩpêx to. Koja mẽ ã inhĩpêx anê pa ixpunuj nê ri ixpa htã koja Tĩrtũm nhÿrmã ixto mex rax nê. Nà kot paj Ejit nhõ pahihti hkôt ri ixpa hkêt nê.

Anhÿr jao ra mẽ pahpyrà nê Kris gryk ã mẽ hkaga. 27Tã akupÿm mẽõ pika hwÿr Ijaewjê ho mõi kaxyw nhũm Ejit nhõ pahihtija tee ri ja hã omu nê kamã gryk tÿx nê. No nhũm Mojesja amnhĩ kaxyw Tĩrtũm kôt hamaxpêr tÿx o hkamnàr rom kãm mẽ uma hkêt nê. Nê mẽ kêp hkwyjê kator pa nê ma akupÿm mẽõ pika hwÿr amnhĩ kôt mẽ o pa. Tĩrtũm kamnàr rom ã mẽ kêp mẽ ho kator anê. Aa kot no ho omunh kêt tâ amnhĩ

kaxyw kãm hamaxpêr tÿx nê hkamnâr rom mẽ kator nê hamakêtkati nê mẽ o pa. 28Nê hkamnâr rom mẽ hkĩnh ã arĩgro mẽ kot kãm “Pas” anhÿr xwÿnhta ho hkrax. Kormã Ejit rÿm kator kêt ri. Nê kaxyw amnhĩ kwÿjê mã hã karõ nê mẽ kãm:

—E pa mẽ amã Tĩrtÿm kapêr jarê ka mẽ inhma. Nà kot puj xep mẽ jarãhã òwêhti hkwÿ pa nê hkamrô ru. Nê hkamrô ho panhõrkwÿ jakwakre hã pĩ kukõ. Hãmri nê ĩ kuxõt nê kuku. Koja kamàt nhÿm mẽ kot amnhĩ tomnuj xwÿnhjê pê mẽ hkra my kot wa piitã mẽ hpar mã xwÿnhja mõi. Hãmri nê mẽ pamÿ ri mõi nê ã mẽ pahte mẽ panhõrkwÿ nhĩpêx anhÿrja ã omu nê tanhmã mẽ pahkrajê ho hkêt nê. Tĩrtÿmja ã mẽ pahte amnhĩ nhĩpêx anhÿr kaxyw ã inhmã karõ anê. Jakamã e pu mẽ hkamnâr rom ã amnhĩ nhĩpêx anê kê mẽ pahkrajaja mẽ pahpê htyk kêt nê. Anê.

Hãmri nê ã mẽ kot Ejit rÿm kator xà hã arĩgrota ã mẽ hkĩnh o kator krax anê. Mẽ hkĩnhja na htem kãm “Pas” anê.

29Nê Ijaewjaja na prem haxwÿja Ejit rÿm kormã Mojes kôt mẽ pa ri urak nê amnhĩ kaxyw Tĩrtÿm mã hamaxpêr. Jakamã na prem ra gõ xujanâr pê “Gõ Kamrêk” anhÿr xwÿnhja mÿ ri kuhê nhÿm Tĩrtÿm mẽ kãm ho axkjê. Nê mẽ kãm hkõt ã ho amgrã nhÿm mẽ hã hkamnâr rom mex nê rêr pa. No nhÿm mẽ hkõt mẽ kot mẽ himex kaxyw mẽ mrrar xwÿnhjaja. Ejit nhõ pòristijaja nhÿm gõja akupÿm mẽ hã axkamur nê mẽ himex pa.

30-31Nê Ijaew kot Mojes mÿr pê Jojue hkõt pa ri mẽ urak nê amnhĩ kaxyw Tĩrtÿm kôt hamaxpêr o pa. Na prem ra Tĩrtÿm kot mẽ kãm pika nhõr xwÿnhta wÿr pøj nhÿm Tĩrtÿm krĩ pê Jeriko hwÿr mẽ kurê. Mẽ kot kamã mẽ pa xwÿnh pê utâr kaxyw mẽ hwÿr mẽ kurê. Mẽõ krĩ pu hã kahêja kên tÿx pix o na pre. Nê hprêk rax kumrêx. Nê krĩ nhõ xwÿnhjaja kãm Tĩrtÿm kapêr mar prãm kêt. Hãmri nhÿm Tĩrtÿm mẽ hã Ijaewjê mã amÿnê nê mẽ kãm:

—E mẽõ krĩja kot paj mẽ amã kugõ nom kêr ka mẽ inhmar kumrêx. Kêr ka mẽ apkati mẽ mẽ õ krĩ hwÿr mra nê kupu hpÿnh o atã apkati kêp 7 nê rĩ ma akupÿm mra. Anê.

Hãmri nhÿm mẽ kuma nê mar xà hkõt ma Jeriko hwÿr mra. Hãmri nê hwÿr pøj nê Tĩrtÿm kamnâr rom krĩ puhã kahêja kupu hpÿnh o hã apkati kêp 7. Hãmri nhÿm apkati pê 7ta ã nhÿm kên tÿx o kahêja mẽ kêp amnhĩ krakrak nê rôrõk pa. Nhÿm mẽ mra nê hkõt krĩ hwÿr agjê nê krĩ nhõ xwÿnhjê nhĩmex pa. Nom krĩ kamã kuprÿ pê Raapja Ijaew pyrã nê amnhĩ kaxyw Tĩrtÿm mã hamaxpêr o pa jakamã nhÿm mẽ kormã mẽ himex kaxyw mẽ hwÿr mõi kêt ri amnhĩ kukamã mẽ hkwÿjaja kot mẽ hã ukapi ho pa kaxyw mẽ hwÿr mẽ kurê. Hãmri nhÿm Raapja mẽ kêp amnhĩ pyrã nê Tĩrtÿm kôt hamaxpêr ã mẽ omu nê hkwÿ kot mẽ himex pymaj amnhĩ nhõrkwÿ kamã mẽ kêp mẽ ho amÿxu nhÿm mẽ hkã hkĩnh pê ma akupÿm hkwÿjê wÿr mõi. Jakamã nhÿm mẽ kot mẽ himex kaxyw

mê hwÿr mra hãmri nê amnhĩ pyrà nê tanhmã Raap mê õ fãmii ho hkêt nhũm mê arĩ htĩr nê pa. Mê uràk nê amnhĩ kaxyw Tĩrtũm kôt hamaxpêr o pa hã omunh xà hkôt tanhmã mê ho hkêt nê.

32Ã na pre mê kot amnhĩ kaxyw Tĩrtũm kôt mê hamaxpêr xwÿnhjaja Tĩrtũm kamnàr rom amnhĩ nhĩpêx anhÿr o pa. Nom jajê pixjaja na prem ã amnhĩ nhĩpêx anhÿr hkêt nê. Mãänên Giteãw nê Parak nê Sãsõ nê Jepte nê Tawi nê Sãmuew nê Tĩrtũm nhÿ hã mê kapêr o pa xwÿnhjaja. Jajê piitã na prem wamtajê pyrà nê amnhĩ kaxyw Tĩrtũm kôt hamaxpêr tÿx rãhã ho pa. Nom kot paj ixprĩ hã tanhmã mê kot hkamnàr rom amnhĩ nhĩpêx to hã mê harênh kêt nê. Kot pa anê nê tokyx harênh par kêt nê. Mê ohtô rax kumrêx jakamã na pa ãm hkwy pix jarê nê hã kagà.

33Na prem hkwyjaja Tĩrtũm kamnàr rom ma mê kot amnhĩ tomnuj xwÿnhjê nhõ krĩ hwÿr mra nê mê kêp mê õ pika pytà. Nê mê hkwyjaja Tĩrtũm kamnàr rom mê ho amnhĩptàr mex o pa. Nhũm prem kãm Tĩrtũm kurê xwÿnhjaja mê hkwyjê pynê nê ahkrehti kamã mry xoprê hkwy nhĩpy mê kurê. Nhũm prem amnhĩ tã mê omu nê amnhĩ kaxyw Tĩrtũm mã hamaxpêr kurê kumrêx nhũm amnhĩ tã mê omu mê nê te mry jakwa ho pikamÿr tÿx pyràk o mê hipêx nhũm ãm mê omunh o kuhê nê tanhmã mê ho hkêt nê. ã na prem Tĩrtũm kamnàr rom amnhĩ nhĩpêx anhÿr o pa.

34Nhũm mê kot kuwy rax kãm mê hkwyjê rênh tã nhũm mê kot amnhĩ kaxyw Tĩrtũm mã hamaxpêr tÿx nhũm amnhĩ tã mê omu nê mê nê tanhmã kuwy ho nhũm mê hxêt kêt nê. Nhũm pre mê hkwyjaja wapo ho mê hkamnhwÿr o mê hkwyjê hpar kaxyw nhũm mê amnhĩ kaxyw Tĩrtũm mã hamaxpêr nhũm amnhĩ tã mê omu nê mê nê tanhmã mê ho nhũm mê amnhĩ rê nê mê umaj hprôt nê ma mra. Mê hihtÿx kêt tã Tĩrtũm kamnàr rom ÿ hã hihtÿx nê mê kãm mê hkurê xwÿnhjê ho krihkrit pa nhũm mê ma akupÿm hapêx.

35Nê mēni hkwyjaja na prem haxwÿja amnhĩ kaxyw Tĩrtũm mã hamaxpêr tÿx o pa. Jao mê hkrajaja mê kêp htyk tã nhũm prem Tĩrtũm kamnàr rom mê ho kuwy nhũm mê kuma nê akupÿm mê kãm mê ho htĩr.

ã na prem amnhĩ kaxyw Tĩrtũm mã hamaxpêr pê mex nê pa anê. No na pre mê hkwyjaja mê uràk nê amnhĩ kaxyw kãm hamaxpêr tÿx tã nhũm Tĩrtũm tokyx mê ho mex kêt nê. Na pre mê kãm mê hkurê xwÿnhjaja Tĩrtũm ã mê par kaxyw. Nê mê hkwyjaja Tĩrtũm ã mê hipêx kati ho pa nhũm mê amnhĩ xà htÿx kãm hamak kãm ty. Nhũm mê himex kaxyw nê mê kãm:

—Kwa mê Tĩrtũm kaga. Kot kaj mê hkaga pa mê amã inhÿre nê mê anhĩmex kêt nê. Anê.

No nhũm mê kuma nê ãm mê kuma nê amnhĩ kaxyw kãm hamaxpêr tÿx pê mê kãm:

—Nà mê kam nê mãmrĩ ixpĩ. Inhmã ixtyk pyma hkêt. Kot paj ty

nhũm Tĩrtũm akupỹm ixto ixtĩr pa kuri inhmex kumrêx nê ri ixtĩr tũm nê ixpa ho ixpa.

Anhỹr o mẽ kãm amnhĩ jarênh jakamã hãmri Tĩrtũm kaga hkêt rãhã nhũm mẽ himex.

³⁶Nê mẽ kãm mẽ hkurê xwỳnhjaja na prem Kris ã mẽ hkwỳjê mã hpêr o pikênh pê mẽ htak xà ho mẽ htak rũnh o pa. Nê kàx o mẽ hkwỳjê hpa hpre nê mẽ hte hpre nhũm mẽ kêp prês nê hkrĩ ho hkrĩ.

³⁷⁻³⁸Nhũm prem kên rũnh o mẽ hkwỳjê htak o mẽ kupa. Nê mẽ hayr o mẽ hkwỳjê pa. Nê mẽ hkamnhwỳr o mẽ hkwỳjê pa. ã na prem Kris kôt mẽ hamaxpêr ã mẽ omunh xà hkôt mẽ hipêx anhỹr o pa. Jakamã na pre mẽ hkwỳjaja mẽ umaj mẽõ krĩ rũm hapôj nê ma hprôt nê mra. Nê te mẽ õ krĩ hkêt pyrã nê kapôt ã kêp amrakati nê ri pa. Mẽ ê hkêt nê ôwêhti hkà ho ê nê ri hã pa. Nê motre kà ho amnhĩ pre nê ri hã pa. Nê kên prêk ã api nê kre kamã hpimxur o pa. Nê pika hkre kamã hpimxur o pa. Nhũm mẽ kãm mẽ hkurê xwỳnhjaja te mẽ kêp ahponu nê mẽ kêp ahkro pyrãk o mẽ hipêx nê axpên mã mẽ harênh o:

— Nà mẽ mexti hã. Kwa pu mẽ piitã mẽ himex paa ri.

Anhỹr o mẽ harênh tã nhũm Tĩrtũm mẽ uràk nê ã mẽ harênh anhỹr kêt nê. Na pre mẽ mex kumrêx ã mẽ harê. Nê nhỹrmã kuri mẽ mex nê pa ho pa hkukamã mẽ harê.

³⁹ã na prem Tĩrtũm kamnàr rom mẽ kãm mẽ hkurê xwỳnhjê kutã amnhĩ to htỳx kãm htyk o pa anê. Nhũm Tĩrtũm ja hã mẽ omu nê hkĩnh nê kãm mẽ hapê htỳx nê. No nhũm mẽ kormã htĩr ri amnhĩm Tĩrtũm kot mẽ ho mex xà jamỳnh kêt rãhã ty. ⁴⁰Tã mo na pre Tĩrtũm kormã mẽ htĩr ri hkwỳjê pyrã nê mẽ ho mex kêt nê? Nà na pre kormã mẽ hkukamã hamaxpêr o:

— Nà kot paj kormã mẽ ho mex kêt nê. Kot pa mẽ mỳr pê mẽ kot ixkôt amnhĩ xunhwỳr mã xwỳnhjê jamãr grire mãn. Kêr pa inhõ krĩ kamã mẽ ho ixpimràatã mẽ ho mex rax kumrêx. Nà kot paj ã mẽ ho mex anê. Ja na kêt inhmã mex o kormã mẽ htĩr ri ixte mẽ ho mexta jakrenh. Anê.

Jao ra ã mẽ papajaja mẽ pakukamã hamaxpêr anê.

Mẽ pahte Jejus pyrã nê mẽmoj kutã amnhĩ to htỳx ã mẽ pamã karõ

Piripos 3.12-26

12 ¹Na pre mẽ pakukamã mẽ panhĩgêk kwỳjaja amnhĩ kaxyw Tĩrtũm mã hamaxpêr pê ã amnhĩ xà htỳx kamã hamak o pa anê. Tã te ra mẽ kot kỳj rũm kaxkwa rũm mẽ pahpumunh nê tanhmã mẽ pamã kapêr to pyrã nê mẽ pamã kapêr o:

— E mẽ inhma mẽ ixkanrêhã mẽ ixtãmnhwỳjaja. Na pa prem ã Tĩrtũm kamnàr rom amnhĩ nhĩpêx o ixpa anê. Mẽ kot ja hã mẽ inhĩpêx kati htã pa prem Jejus kaga hkêt nê. Tã kêr ka mẽ ixpyrã nê ã mẽ kãm

mê akurê xwÿnhjê kutã amnhĩ to htÿx anê. Nê mê ixpyrà nê amnhĩ kaxyw Tĩrtũm kôt pix mã ajamaxpêr tÿx rãhã ho ri apa. Anê.

Jakamã kwa kêr pu mê uràk nê ã amnhĩ nhĩpêx anhÿr rãhã ho mãn ri papa. Te mê hprôt xwÿnhjaja kot amnhĩ nhĩpêx pyrãk o amnhĩ nhĩpêx. Na htem hprôt tÿx kaxyw mẽmoj pytĩ jamÿnh nê ho hprôt hkêt nê. Na htem ý kamã hprôt o hprôt tÿx nê wam hkwyjê mã wa nê mra. Ja pyrà nê kêr pu mê pahte Tĩrtũm kapêr kôt amnhĩ nhĩpêx mex o papa kaxyw tanhmã mẽ pahte amnhĩ tomnuj to hã amnhĩ pumu nê hkaga kurê kumrêx. Mẽ pahte amnhĩ tomnuj o papa xãja te mex pyrãk no ãm mex kêt. Te ho mẽ hprôt xwÿnh kot axtem nê mẽmoj pytĩ mÿnh nê tee ri ho hprôt tÿxta pyrãk. Kot puj mẽ tanhmã amnhĩ tomnuj to ho papa nê Tĩrtũm kapêr kôt amnhĩ nhĩpêx mex kêt nê. Jakamã kwa kêr pu mẽ Tĩrtũm kapêr gryk ã amnhĩ tomnuj nê amnhĩ to htÿx rãhã ho papa. Te ho mẽ hprôt nê nhÿri mẽ àhuk xà pix kukamã hamaxpêr rãhã hprôt tÿx xwÿnhhta pyrà nê ãm Jejus mã pajamaxpêr tÿx rãhã ho papa.

2E kot paj mẽ amã Jejus kot tanhmã mẽ panê amnhĩ nhĩpêx toja jarê ka mẽ inhma. Nà kot mẽ panê mẽ pahte amnhĩ tomnuj pãnhã amnhĩrer kaxyw htyk nhũm mẽ pahte hkôt amnhĩ xunhwÿr jakamã na hte mẽ pamã pajamaxpêr nyw gô pu mẽ amnhĩ kaxyw hkôt pajamaxpêr ho ri papa. Na pre mẽ kãm hkurê xwÿnhjaja kot pĩ kahpa hã nhôr nê hpĩr mã nhũm mẽ kutã mẽ kãm amnhĩ to htÿx nê arĩ mẽ kãm xa nhũm prem kupĩ. Tã tee ri amnhĩ kukamã hamaxpêr o Tĩrtũm kaga hkêt nê. Na pre hamaxpêr o:

— Nà kwãr mẽ mãmri xpĩ. Kot paj ty nhũm Inhĩpêêxà akupÿm ixto ixtĩr pa kuri inhmex kumrêx nê ixtĩr tũm nê ixpa ho ixpa. Anê.

Tã na ra kaxkwa kamã Tĩrtũm xupôk rũm mex nê hkrĩ ho hkrĩ. 3Jakamã kwa kêr pu mẽ kot ã mẽ panê amnhĩ nhĩpêx anhÿrja mã pajamaxpêr rãhã ho ri papa. Mẽ kot hipêx kati htã nhũm mẽ kutã amnhĩ to htÿx nê xa. Tã kêr pu mẽ uràk nê mẽ kãm mẽ pahkurê xwÿnhjê kutã amnhĩ to htÿx rãhã ri papa. Jao tee ri amnhĩ kukamã pajamaxpêr o mẽ umaj Tĩrtũm kaga hkêt nê.

4Na ka htem ma mẽ kot amnhĩ tomnuj xwÿnhjê hwÿr mra nê mẽ kot amnhĩ tomnuj kaga kaxyw tanhmã mẽ kãm akapêr to nhũm mẽ ja hã mẽ ama nhũm ja mẽ kêp omnuj nhũm mẽ amnhĩ tã tanhmã mẽ atomnuj to. Nom wam mẽ kot mẽ pahkwÿjê nhĩpêxta pyrà nê kormã mẽ atôxpĩr kêt nê.

Tĩrtũm kot tanhmã hkrajê nhĩpêx to hã harênh

Juãw 15.1-2; Eprêw 5.7-8; Xiakre 1.2-4

5Nê mãn ka mẽ arĩ Tĩrtũm kapêr ã kagã htũm kwÿ hã ano htÿx japêr. Mẽ pahpê Tĩrtũm krajê mã kapêr jarênh kot:

Koja Pahi Maati tanhmã mẽ ate amnhĩ tomnuj to nê mẽ amã kapêr ka mẽ ama nê mar tỳx nê mẽmojta kaga kurê kumrêx. No mẽ ama nê tee ri kot nê akurê xwỳnhta kukamã ajamaxpêr o ri akaprĩ o axtem nê Tĩrtũm kaga hkêr nê. Ama nê kot amã mẽmoj nê kapêr xwỳnhta kaga kurê kumrêx.

6 Na hte Tĩrtũm kãm mẽ pajapê hã tanhmã mẽ pahte amnhĩ tomnuj to hã mẽ pahpumu nê hã tanhmã mẽ panhĩpêx to. Tãm mẽ pahte amnhĩ nhĩpêx o papa kaxyw. Kot mẽ pahpê hkra hã mẽ pajarênh jakamã na hte ã mẽ pahte tãm amnhĩ nhĩpêx o papa kaxyw mẽ panhĩpêx anê. Anê.

7 Jakamã kot kaj mẽ tanhmã amnhĩ tomnuj toja mỳrapê tanhmã apunuj kute nê ri apa htã no ãm tee ri amnhĩ kukamã ajamaxpêr hkêr nê. Kêr mẽ ãm ajamaxpêr o:

— Nà ixte tãm amnhĩ nhĩpêx kaxyw na Tĩrtũm ã inhĩpêx anê. Ixpê hkra hã ixte amnhĩ to mex o ixpa prãm xaj ã inhĩpêx anê.

Anhỹr o mãn kêr ajamaxpêr. Na hte mẽ hipêxã mẽ hkra kot amnhĩ to mex kaxyw ã mẽ hipêx anê. Tã Tĩrtũm na hte mẽ urak nê ã mẽ panhĩpêx anê. 8 No koja mẽhõ hkra kot tanhmã amnhĩ tomnuj to hã omu nê ãm omu nê hã tanhmã ho hkêr nê. Hã koja hkraja te hipêxã hkêr nê hã awrãre nê ri pa pyrak. Tã mẽ pahpê Tĩrtũm krajaja kot puj mẽ tanhmã amnhĩ tomnuj to nhũm ja hã mẽ pahpumu nê hã tanhmã mẽ pahto. Nom mẽ kêp hkra hkêr xwỳnhjaja nhũm hte ja hã mẽ omu nê ãm hã mẽ omu nê hã kormã tanhmã mẽ hipêx to hkêr nê.

9 Nê na hte mẽ panhĩpêxã mẽmoj tã mẽ pamã karõ pu htem kuma nê hkõt amnhĩ nhĩpêx. Ja mex. Nom kaxkwa kamã Měpahpãm maatija mẽ pahte mar nê hkõt amnhĩ nhĩpêxja na kêr mex kumrêx. Kot puj mẽ ã amnhĩ nhĩpêx anê nê nhỹrmã kuri pamex nê pahpũm nê papa ho papa.

10 Nê mẽhprĩre na htem hamaakro nhũm mẽ hipêxã tanhmã hã mẽ ho. Hã mẽ hkaprêprêk rỳ hã mẽ kãm akir. Amnhĩ krã hkõt tanhmã mẽ hipêx to. Mẽ kot ja hã amnhĩ pumunh nê axte hkêr kaxyw. Ja mex. Tã mẽ papajaja. Mẽ pahpê Tĩrtũm kra na pu htem tõhã tanhmã amnhĩ tomnuj to nhũm mẽ pahpumu nê tanhmã hã mẽ pahto. Mẽ pahte amnhĩ pumunh nê axte hkêr kaxyw. Urak nê amnhĩ to mex pix o papa kaxyw.

11 Na hte mẽmoj tã tanhmã mẽ panhĩpêx to pu mẽ tee ri amnhĩ pumu nê pahkaprĩ nê pahkĩnh kêr nê ri papa. Nom kot puj mẽ tokyx tanhmã amnhĩ tomnuj tota kaga nê akupỹm Tĩrtũm kõt tãm amnhĩ nhĩpêx o papa nê akupỹm pahkĩnh nê pajamakêtkati nê ri papa.

Mẽ pahte Tĩrtũm kaga hkêr ã mẽ pamã karõ

12 Jakamã e kwa kêr ka mẽ amnhĩ to htỳx nê apa. Mẽ kot Kris ã tanhmã mẽ anhĩpêx to htãã. ãm Tĩrtũm kõt pix mã amnhĩ nhĩpêx mex pê

akĩnh nê apa. 13Kêr kê Kris kôt atôjê hõ tee ri mêmoj tã amnhĩ pumunh kôt ra Tirtũm kaga kaxyw tã ã mē ate amnhĩ nhĩpêx anhỹr ã mē apumu nē mē apyrà nē akupỹm hkôt amnhĩ xãm tỹx nē hkaga hkêt nē.

14Nê kêr ka mē tãm ri axpên nhĩpêx o ri apa. Jao axpên kôt ajamakêtkati nē ri apa nē amnhĩ to mex pix kukamã ajamexpêr. No kot kaj mē anhỹr kêt nē nhỹrmã mē panhõ Pahi Maati hwỹr axàpir nē kuri amex nē apa hkêt nē.

15Na hte Tirtũm mē pahto mex nē mêmoj to mē pakutã nojarêt rãhã o pa. Jakamã kwa kêr ka mē hkaga hkêt nē. Nê tanhmã ri ajamexpêr punuj to ho ri apa hkêt nē. Kot ka mē ã amnhĩ nhĩpêx anê nhũm Kris kôt mē pahkwỹjaja ja hã mē apumu nē mē apyrà nē tanhmã amnhĩ tomnuj.

16Nê kêr ka mē axpên kãm apijaàm kêt o ri apa hkêt nē. Nê te finat Ejau kot amnhĩ nhĩpêx pyræk o ri apa hkêt nē. Na pre Tirtũm ã hpijaàm kêt nē hkwyjê kamã hpijaàm kêt o pa. Nê Tirtũm mã hamexpêr kêt kumrêx. Kêp Ijak kra kot wa jakamã koja nhỹrmã hipêêxà mỳr pê kêp hikukrêx nê õ pika piitã ho àrĩk pa. Hãmri nhũm hipêêxà kot ho Tirtũm wỳr nhũm kot ho mex kaxyw mã tã nhũm axtem nē mēmo arĩgro hã kãm prãm xàj kot kêp mêmoj to àrĩk mã xwỳnhta htõ Jako mã hkaga hpa. Mankwrytre gôj kãm ãm prãm xàj kãm hkaga hpa. Jakamã nhũm Jako hpãnhã te kêp Ijak kra kot wa pyrà nē mỳr pê õ mêmoj piitã ho àrĩk mã. 17Gaa nhũm Ejau tee ri ã amnhĩ nhĩpêx anhỹrja mã hamexpêr o hkaprĩ nē. Nê tee ri kãm Jako kot akupỹm kãm mêmojta nhõr prãm kaprỹ. Nê mur nê hã hipêêxà wỳ no nhũm axte kãm mêmoj nhõr kêt nē. Nhũm kot ho Tirtũm wỳr kaxyw tee ri amnhĩ to kuwỳ no nhũm kuma nê ãm kuma nê kãm ho anhỹr kêt nē.

18Nê amnepê mã Tirtũm kot mē panhĩgêxjê mã kapêr kaxyw na prem hixêt prêk pê Sinai jarênhja wỳr akuprõ nê hparpê kuhê. Hãmri nhũm hixêt nhĩmök ã kuwy hpøk rax kumrêx. Nê kuwy mỳr ri kakrã htyk ajêt. Nê kôk àpêr tỹx nē. Nhũm Ijaewjaja hixêt krax ã omu nê kãm maa ho htertet o kuhê. 19-21Hãmri nhũm mēhõ pifti kakô nhũm Tirtũm hixêt nê mē kãm kapêr nê mē kãm:

—E mē inhma. Kêr ka mē hixêt ã axàpir kêt nē. Kot kaj mē atõ hã api rỳ mē akrit õ hã api ka mē ja hã omu nē kaxyw kên rũnh kwỳ jamỳ nê ho htak o apĩ. Anê.

Hãmri nhũm mē piitã tee ri kuma nê kãm ma htỹx kumrêx nê amnhĩ nê kãm:

—Kwa hãmri Tirtũm. Axte mē inhmã mêmoj jarênh kêt nē. Mojes pix mã mãn mē ixkaxyw tanhmã kãm akapêr to. Anê.

Jakamã nhũm Mojes Tirtũm mã amnhĩ jarênh nê kapêr mar kaxyw hixêta ã api. Kãm ma nê htertet rãhã mō nê hã api. 22Nom mē kãm ma ho Tirtũm mã amnhĩ jarênh tã mē papajaja na pu htem mē kurom

paxàmnhîx kãm amnhî jarênh o papa. Na pu htem kãm amnhî jarênh kaxyw nê hixêt prêk ã paxàpir kêt nê. Te ra mẽ pahte ma kaxkwa hwÿr ò krî hwÿr paxàpir nê pano ho omunh pê kãm amnhî jarênh pyrâk. Ò krîja mex o mex. Kamã kapêr o mẽ wrÿk xwÿnhjaja ohtô o ohtô. Na htem kamã hkînh rãhã ho pa ho pa.

23Nê ò krî hwÿr na hte hkra xàpir xwÿnhjaja ri pa. Nê mẽ papajaja na pu htem kãm amnhî jarênh kaxyw nê te kaxkwa kamã kuri pakuhê nê kãm amnhî jarênh pyrâk o amnhî nhîpêx. Te mẽ pahpê hkra kot wa pyrâk jakamã mẽ pamã uma hkêt. Nhùm pre Tîrtùm ra ò kagà kamã mẽ pakutêp amnhîm mẽ panhîxi hã kagà hpa. Na hte mẽmoj piitã hamãr o hkrî. Nê krîja kamã amnepêm kormã Kris kot mẽ pahwÿr wrÿk kêt ri nhùm ra amnhî kaxyw Tîrtùm kôt hamaxpêr mex xwÿnhjaja haxwÿja ra kamã ri pa. Ra Tîrtùm kot mẽ ho hkra jakamã nhùm mẽ kuri ri pa ho pa. 24Nê Jejus haxwÿja kamã pa ho pa. Na pre mẽ panê htyk nê hkamrô pikapîrja o mẽ pahte amnhî tomnuj pãnhã amnhîre. Jakamã na pu htem hkôt amnhî xunhwÿ nhùm mẽ pahto hkra pu mẽ paxàmnhîx ri Tîrtùm mã amnhî jarênh nê amnhî to hwÿr o papa.

Amnepêm na pre Tîrtùm tee ri Kaî kot htô Apew pîr nê hkamrô pikapîrja ã omu nê hamaxpêr o:

—Nà ã kot amnhî nhîpêx anhÿr jakamã kot paj hã homnuj tÿx nê. Anê.

Tã ra hpãnhã Jejus kot mẽ panê htyk nê hkamrô pikapîrja ã omu nê ra axtem hamaxpêr o:

—Nà ãm hãmri na Ixkraja mẽ nê ty. Jakamã mẽ kot hkôt amnhî xunhwÿr xwÿnhjaja kot pa Ixkra kukwak ri mẽ kot amnhî tomnuj mÿrapê tanhmã mẽ ho hkêt nê.

Anhÿr o mẽ pakukamã hamaxpêr. ã hamaxpêr anhÿrja mex o mex.

25Na pre Mojes Tîrtùm nhÿ hã mẽ panhîgêxjê mã xatã mẽ kãm Tîrtùm kapêr jarênh o ri pa nhùm mẽ kuma nê hkôt amnhî nhîpêx o pa. Tã gaa nê ra hã nohkêt pa nê akupÿm mẽ kot amnhî nhîpêx tùm o awjanã nhùm Tîrtùm tee ri ja hã mẽ omu nê mÿrapê tanhmã mẽ hipêx to. Tã nhùm Kraja kaxkwa rùm mẽ pahwÿr wrÿ nê mẽ pamã kapêr. Jakamã kwa mẽ okora kêr pu mẽ panhîgêjtê pyrã nê mẽ pahte amnhî nhîpêx tùm o paxujanãr kêt nê. Kot puj mẽ anê nhùm Tîrtùm ja hã mẽ pahpumu nê mẽ urak nê ja hã tanhmã mẽ panhîpêx to.

26Amnepêm Tîrtùm kot hixêt prêk pê Sinai kamã mẽ kãm kapêrja. Na pre kapêr tÿx o pika ho àk nhùm htertê tÿx nê. Tã koja nhÿrmã axte pika ho àk nê kaxkwa ho àk nhùm wa hamê htertê tÿx kumrêx. Koja axte ho anhÿr ho pixi nê axte ho anhÿr kêt nê. 27Tã nhÿrmã axte mẽmoj to àk ã amnhî jarênh jakamã koja mẽmoj to kator xwÿnhhta piitã ho àk. Nê mẽ pahte panhîhkra ho mẽmoj nhîpêx xwÿnhja nhùm ho àk nhùm htertê tÿx kãm hpigrãnh pa nê hapêx. Nhùm mẽmoj htertê nê hpigrãnh

kêt xwÿnh pixjaja arĩ rãhã ho rãhã. 28No Tĩrtũm nhõ krĩ koja htertet nẽ hapêx kêt nẽ. Nẽ mẽ papajaja mẽ pahpê hkra jakamã te ra kuri õ krĩ kamã ri mẽ papa pyrãk. Jakamã kot puj mẽ mẽ urãk nẽ pajapêx kêt nẽ. Jakamã e kwa kêr pu mẽ amnhĩ tã Tĩrtũm mã mex o mex ã harênh nẽ hã pahpijaàm rãhã ho papa. Nẽ tanhmã amnhĩ tomnuj to hã amnhĩ pumu nẽ Tĩrtũm pumaj mẽmojta kaga kurê kumrêx. ã mẽ pahte amnhĩ nhĩpêx anhÿr o papaja na Tĩrtũm kãm hprãm. 29Hihtÿx o hihtÿx jakamã koja mẽmoj tã akamã gryk kot kaj amex kêt o amex kêt.

Mẽ pahte Tĩrtũm kãm hprãm xà hkõt amnhĩ nhĩpêx ã mẽ pamã karõ

Rõmãn 12.1-2; Epes 4.1-3; Korosẽ 1.10-11; Wam Tesarõn 4.1-12;

Wam Pêtre 2.11-12; Wam Juãw 3.17-18

13 1Nẽ e kwa Kris kõt ixtõ nẽ ixtõxjaja. Kêr pu mẽ arĩ Kris kõt pahkwÿjê ho mex o mãn axpên kõt ri papa. Nẽ kêr pu mẽ tanhmã pahpunuj to hã amnhĩ pumunh tã axpên to mex mã panhũrer kêt nẽ. ã axpên nhĩpêx anhÿr rãhã ho papa.

2Nẽ amnepê mã na pre mẽmojaja nhÿhÿnh mra nẽ mẽ panhĩgêjtjê hõ hwÿr pøj. Hãmri nhũm mẽ omu nẽ htÿx axtem krĩ hõ nhõ xwÿnh ã mẽ hkamnhix tã no nhũm mẽ kêp Tĩrtũm kapêr o mẽ wrÿk xwÿnh kwÿ na prem. Hãmri nhũm amnhĩ nhõrkwÿ hwÿr mẽ kuwÿ nhũm mẽ ma hkõt mra nẽ kuri pøj nẽ kutã apku. Jakamã kwa koja nhÿhÿnh krĩ hõ rũm mẽmojaja ma mẽ awÿr mõ ka mẽ omu nẽ axãmnhix amnhĩ nhõrkwÿ hwÿr mẽ hwÿr kurê kumrêx kê mẽ ari pøj. ã mẽ hipêx anhÿr o apa hãmri nẽ nhÿrmã mẽ panhĩgêjtja pyrã nẽ amnhĩ wÿr Tĩrtũm kapêr o mẽ wrÿk xwÿnhjê hõ hwÿr japêr. Mẽ urãk nẽ ja hã mẽ omunh kêt tã atÿx amnhĩ wÿr mẽ awÿ nhũm ja mẽ amã mex o mex.

3Nẽ kêr ka mẽ ra mẽ kot Jejus ã mẽ akwÿjê pynênh nẽ mẽ hagjênh xwÿnhjê mã ajamxpêr rãhã ho ri apa nẽ mẽ ho ajamakêtkati hkêt nẽ. Te mẽ kajaja mẽ ãhkõ hã mẽ hagjênh xà kamã apunuj nẽ akrĩ pyrãk o mẽ kãm ajamxpêr o ri apa. Jao mẽ kamã axukaprĩ ho mẽ hwÿr mra nẽ mẽ kãm mẽmoj nhõr o ri apa.

4Nẽ mẽ kot axpên to hprõja na mex. Nom kêr ka mẽ amyjaja ãm aprõ pix tânopxar o ri apa. Nẽ mẽ anijaja mẽ ajaxwÿja amjên pix tânopxar o ri apa. No mẽ hkuprÿjê hwÿr mẽ mrrar xwÿnhjaja nẽ nhãm mẽ kêp mẽ hprõ ho amnhĩkati xwÿnhjaja nẽ nhãm mẽ kêp mẽ mjên o amnhĩkati xwÿnhjaja koja Tĩrtũm ja hã mẽ omu nẽ mẽ homnuj tÿx kumrêx.

5-6Nẽ kêr ka mẽ akãxpore rũnh kêt ã amnhĩ pumu nẽ tee ri amnhĩ kukamã ajamxpêr o akaprĩ hkêt nẽ. Na pre Tĩrtũm mẽ pamã kapêr o:

Kot paj akõt ri ixpa rãhã ho ixpa nẽ aa arer rÿ akaga hkêt kumrêx.

Anhÿr jakamã kot kaj mẽ akãxpore grire htã akaprĩ nẽ apa hkêt nẽ. Aa Tĩrtũm kot mẽ pahkaga hkêt ã amnhĩ jarênh jakamã mẽmoj kot pu wem

omu nê pamã nhãm ri mẽ uma ho papa? Tirtũm kot mẽ pahkõt pa ho pa kênã. Jakamã na pu htem pajamxpêr o:

Nà Pahi Maatija ra kot ixkõt pa ho pa xwỳnh jakamã mẽmo kot pa hkêt ri inhmã uma ho ixpa?

Mẽmo kot kêt ri tanhmã kêp ixto?

Anhỹr o pajamxpêr o papa. 7Nê mẽ kot Kris mã mẽ ajamãr o mẽ pa xwỳnh ra mẽ htyk xwỳnhjaja ka mẽ arĩ mẽ kot tanhmã amnhĩ nhĩpêx to ho paja mã ajamxpêr rãhã ho ri apa. Na prem Tirtũm kapêr o mẽ ajahkre mex nê. Nê tãm ri amnhĩ nhĩpêx o ri mẽ akõt pa. Nê amnhĩ kaxyw Tirtũm kõt pix mã hamxpêr rãhã ty. Tã kêr ka mẽ urak nê ã amnhĩ nhĩpêx anhỹr o ri apa rãhã ty.

8Nê Jejus Krisja arĩ rãhãã. Nê amnepê mã kot amnhĩ nhĩpêxja mããnên arĩ rãhãã. Aa kot amnhĩ nhĩpêxja nhĩjuk ri axtem tanhmã amnhĩ nhĩpêx to hkêt.

9Nê kwa kêr ka mẽ Tirtũm kõt amnhĩ nhĩpêx rãhã ho ri apa. Na hte kapêr o hêx xwỳnhjaja mẽ awỳr mra nê mẽ amã:

— Amnepêm mẽ ate Tirtũm kot mẽ amex ã mẽ ajarênh kaxyw mẽ ate kãm mẽmo mry nhõr nê akupỹm hamỳnh nê hkur o apa htã ra ja ho anhỹr kaga. Kwa mẽ ja ho awjanã nê axte ã amnhĩ nhĩpêx anhỹr o ri apa. Kê Tirtũm ja hã mẽ apumunh kõt mẽ amex ã mẽ ajarê.

Anhỹr o mẽ amã kapêr. Nom xà na hte Tirtũm ã mẽ pahte amnhĩ nhĩpêx anhỹr ã mẽ pahpumunh kõt mẽ pamex ã mẽ pajarê? Xà na htem mẽmo mẽ apkur xà hkur pê amnhĩ kaxyw Jejus kõt hamxpêr tỳx o pa? Nà na htem anhỹr kêt nê. Na pu htem mẽmoj kur kõt pamã Tirtũm kĩnh kêt nê. Kêt mẽ paxàpkur xàja mẽ panhĩ pix o hihtỳx kaxyw na. Na hte Jejus kõt mẽ pahto paxihtỳx kêt nê. ãm Tirtũm kot amarĩ kãm mẽ pajapê nê mẽmoj to mẽ pakutã nojarêr jakamã na pu htem ja hã amnhĩ pumu nê amnhĩ kaxyw hkõt pajamxpêr tỳx o papa.

10Tirtũmjaja Jejus kot mẽ panê htyk ã omunh xà hkõt ra kot mẽ pamex ã mẽ pajarênh jakamã mo kaxyw kot pu mẽ axte kot mẽ pamex ã mẽ pajarênh kaxyw kãm mẽmo mry gõ nê hkwỳ hku? Koja mēhõ akupỹm Tirtũm kapêr tũm o ujanãr jao Jejus kot nê htyk nê hkamrô pikapĩrja kaga. 11Amnepêm na pre patre maatijaja tõhã mẽ kãm mẽmo mry hpar xwỳnh hkamrô ru nê guhkrax kãm kuru nê hamỳ nê ma o mra nê Tirtũm nhõrkwỳ kaàkre hwỳr hitom maati hwỳr ho agjê. Tirtũm kot mẽ omunh nê axte mẽ kot amnhĩ tomnuj mã hamxpêr kêt kaxyw. Hãmri nhũm hpãnhã ĩ mỳ nê krĩ pê ho kato nê ma o mra nê nhỹri amỳm hkwỳjê hkàx ã ho hxêr pa. Tirtũm kapêr tũm kõt na prem ã amnhĩ nhĩpêx anhỹr o pa. 12Tã ja pyrã nê na prem ma krĩ pê amỳm Jejus o tẽ nê kupĩ nhũm hkamrô axkapĩ. Kot mẽ pahte amnhĩ tomnuj pãnhã amnhĩrer nê mẽ pahto mẽ pahpê Tirtũm kra kaxyw ã htyk nê hkamrô pikapĩr anê. 13Na prem Tirtũm kapêr tũm gryk ã Jejus kaga nê pōristijê mã anê nhũm mẽ

ma krĩ pê ho kato nê o tẽ nê kupĩ. Tã kêr pu mẽ jajê rom Jejus gryk ã mãn Tĩrtũm kapêr tũm kaga. Kwâr mẽ mãmri Jejus pyrã nê Tĩrtũm ã tanhmã mẽ pahto nê amnhĩ nê nhỹhỹm mẽ pajano. 14Kêt jar mẽ papapxàja kêp mẽ papapxà kumrêx kêt. Nê jar mẽ panhõ krĩja kêp mẽ panhõ krĩ kumrêx kêt. Mẽ pamã te kot pô nhĩrõnh o ixkre pix pyrãk. No kêt mẽ panhõ krĩ kumrêx koja jar mẽ panhõ krĩ rom aa hapêx kêt nê. Tã tãm na pu mẽ kormã ma hwỳr papa kaxyw arĩ amnhĩ tã Tĩrtũm jamãr o papa.

15Nê na htem Ijaew arĩ ohtô nê amnhĩ pãnhã Tĩrtũm mã mry hpar ho pa. Nom mẽ papajaja kot puj mẽ axte ã amnhĩ nhĩpêx anhỹr hkêt nê. Kot puj mẽ ãm Jejus kukwak ri Tĩrtũm mã mex o mex ã harênh rãhã ho mãn papa. Jao te mẽ pahte kãm hkĩnh xà nhõr pyrãk o amnhĩ nhĩpêx.

16Nê kêr pu mẽ arĩ axpên to mex o ri axpên kôt papa. Nê kê mẽhõ kêp amrakati japêr ka ja hã omu nê amnhĩ kutã kãm anhõ mẽmoj kwỳ. ã kot puj mẽ axpên nhĩpêx anhỹr rãhã ho ri axpên kôt papa. Kot puj mẽ anê nê te mẽ pahte Tĩrtũm mã hkĩnh xà nhõr pyrãk o amnhĩ nhĩpêx. ã mẽ pahte amnhĩ nhĩpêx anhỹrja na mex o mex.

17Nê kêr ka mẽ Kris kôt mẽ akrãhtũmjê kapêr ma nê mẽ hkôt amnhĩ nhĩpêx mex nê. Na htem Tĩrtũm mã mẽ ajamãr o ri mẽ akôt pa. Koja mẽ nhỹrmã mẽ kot tanhmã mẽ anhĩpêx to hã Tĩrtũm mã amnhĩ jarê. Jakamã mẽ kãm mẽ ato ajuta prãm. Tã kêr ka mẽ kapêr ma nê mẽ hkôt ri amnhĩ nhĩpêx mex o ri apa. Kêr kê mẽ amnhĩ tã mẽ apumu nê hkĩnh nê. No kot kaj mẽ ama nê ãm mẽ ama nhũm mẽ tee ri amnhĩ tã mẽ apumu nê hkaprĩ nê. Jao tee ri kot tanhmã mẽ ato ajuta mex to hkukamã hamaxpêr.

18Nê kwa kêr ka mẽ ixto Tĩrtũm wỳr rãhã ho apa. Inhmã Tĩrtũm noo mã tanhmã amnhĩ tomnuj to hprãm kêt. ãm inhmã amnhĩ to mex pix o ri ixpa hprãm.

19Nê kêr ka mẽ ixto awỳ kê tokyx akupỹm mẽ awỳr inhmẽ. Na pa ra inhmã mẽ apumunh prãm tỳx nê.

Kaga nhĩpêx xwỳnh kot tanhmã mẽ ho Tĩrtũm wỳr to hã harênh

Epes 3.14-19; Piripos 1.0-11; Wam Tesarõn 3.9-13, 5.23;

Sikũn Tesarõn 1.11-12, 2.16-17

20Nê mẽ panhõ Pahihiti Jejus Krisja na hte mẽ panhĩpêx o te ôwêhti jamãr xwỳnh kot hkrit jamãr pyrãk o pa. Jakamã kêp mẽ pajamãr xwỳnh maati mex na. Na pre mẽ panê ty nhũm Tĩrtũm akupỹm mẽ pamã ho htĩr nê mẽ pamã harênh o:

—E ra Ixkra kot mẽ anê htyk jakamã kêr ka mẽ ãm ixkapêr nyw kôt pix mã ri amnhĩ nhĩpêx o ri apa. Kot kaj mẽ ã amnhĩ nhĩpêx anê hãmri nê nhỹrmã ty pa akupỹm mẽ ato mẽ atĩr ka mẽ ixri atĩr tũm nê apa ho apa. Anê.

Tĩrtũm kêp mẽ pahto mẽ pajamakêtkati nê ri mẽ papa xwỳnh na.
 21Tã na pa hte tanhmã mẽ ato hwỳr to ho ixa nê mẽ ato hwỳr o:

—Pa Tĩrtũm. E kwa tanhmã ixkwỳjê ho mex to kê mẽ kãm akapêr kôt pix mã amnhĩ nhĩpêx o pa hprãm. Nê mẽ kãm tãm amnhĩ nhĩpêx o pa hprãm. Nê kê Jejus haxwỳja tanhmã mẽ ho mex to kê mẽ war amã hprãm xà hkôt pix mã war amã tanhmã ri amnhĩ nhĩpêx to ho pa. Anê.
 E kêr pu mẽ arĩ Jejus Kris mã mex o mex ã harênh rãhã ho papa.

Kagà jatur xà kamã mẽmoj jarênh

22E Kris kôt ixkrãmnhwỳjaja. Nà na pa ã mẽ amã kagà nhĩpêx anê. Jejus kôt mẽ ato mẽ axihtỳx kaxyw. No na pa ho ry nê hipêx kêt nê. Ixte ho grire nê hipêx jakamã kwa kêr ka mẽ kamã harê nê mar tỳx nê hkôt amnhĩ nhĩpêx mex o ri apa.

23Nê mãn ka mẽ ra Ximotre jarênh mar japêr. Na pre Kris ã mẽ hagjênh xà kamã hkrĩ hã apkati xohtô nê. Tã nhũm xep mẽ ra kator. Tã koja kormã mẽ awỳr inhmõr xwỳj ri man ixwỳr mỗ nê hpôx japêr kot paj ma amnhĩ kôt mẽ awỳr o mỗ ka mẽ omu.

24Nê kêr ka mẽ kot Kris mã mẽ ajamãr xwỳnhjê mã ijarê. Nê atar Tĩrtũm krajê piitã mẽ kãm ijarê.

Nê ota jar Tĩrtũm kra hkwỳja piitã mẽ awỳr hpêr mẽ.

25E kê Tĩrtũm mẽ apiitã mẽ ato mex o pa. Tã ãm ja pix. Na pa ã mẽ amã hã kagà ho anê. Na hapêx.